







# চরিতাবলী

শ্রীস্বরচন্দ্র বিদ্যাসাগর প্রণীত ।

ষট্‌ত্রিংশ সংস্করণ ।

কলিকাতা

সংস্কৃত বহু ।

সংবৎ ১৯৪৫ ।

PUBLISHED BY THE CALCUTTA LIBRARY,  
No. 25, BURNES STREET, CALCUTTA.

1889.

Price Four Annas.

মূল্য চারি আনা ।



# চরিতাবলী



শ্রী অক্ষরচন্দ্রবিদ্যা সানন্দ প্রণীত।

বইত্রিংশ সংস্করণ।

কলিকাতা

সংস্কৃত বঙ্গ।

সংবৎ ১৯৪৫।

PUBLISHED BY THE CALCUTTA LIBRARY,

NO. 25, BUKHAS' STREET, CALCUTTA.

1889.



# সূচী



পৃষ্ঠা

ডুবাল ... ..	৭
উইলিয়ম রস্কো ... ..	১৯
হীন ... ..	২৪
জিরম ষ্টোন ... ..	৩৪
হট্টর ... ..	৩৮
সিমসন ... ..	৪৪
উইলিয়ম হটন ... ..	৫৩
ওগিলবি ... ..	৬৩
লীডন ... ..	৬৮
জেক্স ... ..	৭৬
উইলিয়ম গিফোর্ড .. ..	৮৫
উইলিয়মসন ... ..	৯৯
উইলিয়ম পট্টেলস ... ..	১০২
এড্রিয়ন ... ..	১০৫
প্রিভো ... ..	১০৭
ডাক্তর এডাম ... ..	১০৯
লমনসক ... ..	১১১
মেডল ... ..	১১৩
লকোমটেনস ... ..	১১৫
রেমস ... ..	১১৬





## বিজ্ঞাপন

সংক্ষেপে, সরল ভাষায়, কতকগুলি মহানুভাবের বৃত্তান্ত লঙ্ঘিত হইল। যে সকল বৃত্তান্ত অবগত হইলে, বালকদিগের লেখা পড়ায় অকুরাগ জন্মিতে ও উৎসাহবুদ্ধি হইতে পারে; এই পুস্তকে তদ্রূপ বৃত্তান্ত মাত্র লঙ্ঘিত হইয়াছে। সমগ্র বৃত্তান্ত লিখিতে গেলে, এরূপ অনেক বিষয়, মধ্যে মধ্যে, নিবেশিত হইত যে, সে সমুদয় এতদেশীয় অল্পবয়স্ক বালকদিগের অনায়াসে বোধগম্য হইত না, এবং ব্যাখ্যা করিয়া বালকদিগের বোধগম্য করিয়া দেওয়া, শিক্ষক মহাশয়দিগের পক্ষেও, নিতান্ত সহজ হইত না।

বালকদিগের নিমিত্ত পুস্তক লিখিতে প্রবৃত্ত হইয়া, যেরূপ যত্ন ও পরিশ্রম করা উচিত, নিতান্ত অনবকাশ ও শারীরিক অসুস্থতা বশতঃ, সেরূপ করিতে পারি নাই; সুতরাং, এই পুস্তকে, অনেক অংশে, অনেক দোষ ও অনেক নূনতা লঙ্ঘিত হইবেক। বারান্তরে মুদ্রিত করণকালে, সেই সকল দোষের ও নূনতার পরিহারে, সাধ্যানুসারে, যত্ন করিব।

শ্রীঈশ্বরচন্দ্র শর্মা


কলিকাতা। সংস্কৃতি কালেজ।

১লা শ্রাবণ। সংবৎ ১৯১৩।





# চরিতাবলী



৮১৮\*

ডুবালা

ফুল দেশের অন্তঃপাতী আর্ন্তনি গ্রামে, ডুবালের জন্ম হয়। ডুবালের পিতা অতি দুঃখী ছিলেন, সামান্যরূপ কৃষিকর্ম অবলম্বন করিয়া, সংসার-যাত্রানির্ব্বাহ করিতেন। ডুবালের দশ বৎসর বয়স, এমন সময়ে, তাঁহার পিতা মাতার মৃত্যু হইল। ডুবালা অতিশয় দুঃখে পড়িলেন। দুঃখে পড়িয়া, তিনি, এক কৃষকের গৃহে, রাখালি কর্ত্তে নিযুক্ত হইলেন। কিন্তু, অল্প দিনের মধ্যেই, কৃষক, সামান্য দোষে, তাঁহাকে দূর করিয়া দিল।

ডুবালা, নিতান্ত নিরুপায় হইয়া, দেশত্যাগ করিয়া, লোন্ডেনে চলিলেন। পথে তাঁহার বসন্ত রোগ হইল। এক কৃষক তাঁহাকে আপন বাড়িতে লইয়া গেল, এবং, চিকিৎসা করাইয়া, পথ্য দিয়া, তাঁহার প্রাণরক্ষা করিল। কৃষক, দয়া

করিল্লা, আপন বাটিতে লইয়া না গেলে, হয় ত, এই রোগেই, ডুবালের মৃত্যু হইত ।

কিছু দিন পরে, ডুবাল, এক মেঘব্যবসায়ীর আলয়ে, রাখাল নিযুক্ত হইলেন । এই সময়ে, এক দিন, তিনি, কোনও বালকের ইন্তে, এক খানি পুস্তক দেখিলেন । ঐ পুস্তকে নানাবিধ পশু পক্ষীর ছবি ছিল । এ পর্য্যন্ত, ডুবালের লেখা পড়ার আরম্ভ হয় নাই ; সুতরাং, তিনি ঐ পুস্তক পড়িতে পারিলেন না ; কিন্তু, ইহা বুঝিতে পারিলেন, পুস্তকে যে সকল পশু পক্ষীর ছবি আছে, উহাদের বৃত্তান্ত লিখিত হইয়াছে ।

ঐ সমস্ত পশু পক্ষীর কথা কিরূপ লেখা আছে, জানিবার নিমিত্ত, তাঁহার অতিশয় ইচ্ছা জন্মিল । তিনি সেই বালককে কহিলেন, তাই ! এই পুস্তকে, পশু পক্ষীর কথা কিরূপ লেখা আছে, আমার পড়িয়া শুনাও । সে শুনাইল না ; ডুবাল বারংবার অনুরোধ করিতে লাগিলেন । কিন্তু, সেই দুই বালক কিছুতেই সম্মত হইল না ।

ডুবাল অতিশয় দুঃখিত হইলেন ; কিন্তু, মনে মনে প্রতিজ্ঞা করিলেন, যে রূপে পারি, লেখা পড়া শিখিব । তিনি, লেখা পড়া শিখিব বলিয়া,

প্রতিজ্ঞা করিলেন, বটে ; কিন্তু শিখিবার কোনও সুবিধা দেখিতে পাইলেন না । যে সকল সমবয়স্ক বালক লেখা পড়া জানিত, তাহাদের নিকটে গিয়া, অনেক বিষয় করিয়া, বারংবার প্রার্থনা করিলেন । তাহারা, কোনও মতে, তাঁহাকে শিখাইতে সম্মত হইল না । অবশেষে, শিখিবার অন্য কোনও সুযোগ দেখিতে না পাইয়া, তিনি স্থির করিলেন, রাখালি করিয়া যা কিছু পাইব, তাহা আর কোনও বিষয়ে ব্যয় করিব না ; যে সকল বালক লেখা পড়া জানে, তাহা দিয়া সম্ভুষ্ট করিয়া, তাহদের নিকট শিক্ষা করিব ।

এই রূপে, ডুবালা লেখা পড়া শিখিতে আরম্ভ করিলেন বটে ; কিন্তু, আর আর দুই বালকেরা বিলক্ষণ ব্যাঘাত জন্মাইতে লাগিল । এজন্য, তিনি সর্বদাই এই চিন্তা করিতে লাগিলেন, যেখানে কোনও গোলমাল নাই, এমন স্থান কোথায় পাই ; এমন স্থান না পাইলে, লেখা পড়া শিখিবার সুবিধা হইবেক না ।

এক দিন, ইতস্ততঃ ভ্রমণ করিতে করিতে তিনি একটি আশ্রম দেখিতে পাইলেন । এই আশ্রমে, পালিমন নামে এক তপস্বী থাকি-

তেন। ডুবাল দেখিলেন, ঐ আশ্রম অতি নির্জন  
 স্থান, কোনও গোলমাল নাই। এজন্য, তিনি  
 মনে মনে স্থির করিলেন, যদি তপস্বী মহাশয়  
 অনুগ্রহ করিয়া, আমার আশ্রমে থাকিতে দেন,  
 জাহা হইলে, এখানে থাকিয়া, ভাল করিয়া,  
 লেখা পড়া শিখিব। পরে, তিনি, তাঁহার নিকট,  
 আপনার প্রার্থনা জানাইলেন। তপস্বী সম্মত হই-  
 লেন। ঐ সময়ে, আশ্রমে একটি ভৃত্য নিযুক্ত  
 করিবার প্রয়োজন ছিল। পালিমন্ ডুবালকে  
 নিযুক্ত করিলেন। ডুবাল, যার পর নাই,  
 আহলাদিত হইয়া, মনের সুখে, আশ্রমের কৰ্ম  
 করিতে, ও লেখা পড়া শিখিতে, লাগিলেন।  
 কিছু দিন পরেই, পালিমন্নের কর্তৃপক্ষীয়েরা,  
 ঐ কৰ্মে, অন্য এক ব্যক্তিকে নিযুক্ত করিয়া  
 পাঠাইলেন। সুতরাং, ডুবালের সে কৰ্ম গেল;  
 এবং, আশ্রমে থাকিয়া, নির্বিঘ্নে লেখা পড়া  
 করিবার যে সুযোগ ঘটিয়াছিল, তাহাও গেল।  
 ডুবাল, যার পর নাই, দুঃখিত হইলেন। পালি-  
 মন্ অতিশয় দয়ালু ছিলেন। তিনি, ডুবালের  
 দুঃখে দুঃখিত হইয়া, এক অনুরোধপত্র লিখিয়া,  
 তাঁহাকে অন্য এক আশ্রমে পাঠাইয়া দিলেন।

ঐ আশ্রমে কয়েক জন তপস্বী বাস করিতেন । তাঁহাদের কতিপয় খেয় ছিল । তাঁহারা, পারি-  
ষদের অনুরোধে, ডুবালকে সেই কয় খেয়র  
রক্ষণাবেক্ষণে নিযুক্ত করিলেন ।

এই তপস্বীরা বড় ভাল লেখা পড়া জানি-  
তেন না । কিন্তু, তাঁহাদের কতকগুলি পুস্তক  
ছিল । ডুবাল প্রার্থনা করাতে, তাঁহারা তাঁহাকে  
ঐ সকল পুস্তক পড়িতে, অনুমতি দিলেন ।  
ডুবাল, এই অনুমতি পাইয়া, অতিশয় আস্থা-  
দিত হইলেন, এবং ইচ্ছামত, সেই সকল  
পুস্তক লইয়া, পড়িতে লাগিলেন । কিন্তু, এ  
পর্যন্ত, তাঁহার অধিক শিক্ষা হয় নাই ; এজন্য,  
আপনি সমুদায় বুঝিতে পারিতেন না । যে  
সকল স্থান কঠিন বোধ হইত, কেহ আশ্রম  
দেখিতে আসিলে, তিনি তাঁহার নিকট জানিয়া  
লইতেন ।

ডুবাল, আশ্রমের কার্য করিয়া, যে অল্প  
বেতন পাইতেন, খাওয়া পরার ক্লেশ স্বীকার  
করিয়া, তাহার অধিকাংশই বাঁচাইবার চেষ্টা  
করিতেন ; এবং, যাহা বাঁচাইতে পারিতেন,  
তাঁহাতে আরম্ভক যত পুস্তক কিনিতেন । এক্ষণে



তিনি অধিক পড়িতে পারিতেন ; সুতরাং, তাঁহার অধিক পুস্তকলাভের অভিলাষ বিলক্ষণ প্রবল হইয়াছিল । কিন্তু, যে আর ছিল, তাহাতে অধিক পুস্তক কিনিবার সম্ভাবনা ছিল না । তিনি, আরব্বন্ধি করিবার নিমিত্ত, কান্দ পাতিয়া, বনের জন্তু ধরিতে আরম্ভ করিলেন । ঐ সকল জন্তু, অথবা উহাদের চৰ্ম্ম, বাজারে লইয়া গিয়া, বিক্রয় করিতেন, এবং তাহাতে মাহা পাইতেন, তাহা জমাইয়া, মনের মত পুস্তক কিনিতেন ।

বন্য জন্তু ধরিতে গিয়া, ডুবাল, কখনও কখনও, বিষয় সঙ্কটে পড়িতেন, তথাপি ক্লান্ত হইতেন না । তিনি, এক দিন, বনের মধ্যে ভ্রমণ করিতে করিতে, এক গাছের ডালে, একটি বন্য বিড়াল দেখিতে পাইলেন । বিড়ালের গায়ের লোমগুলি অতি চিক্কণ দেখিয়া, তিনি বিবেচনা করিলেন, এই বিড়ালের চৰ্ম্ম বেচিলে, কিছু অধিক পাওয়া মাইবেক ; অতএব, ইহাকে ধরিতে হইল । এই বলিয়া, গাছে চড়িয়া, ডুবাল বিড়ালকে ধরিবার চেষ্টা করিতে লাগিলেন । বিড়াল, তাঁহার অভিপ্রায় বুঝিতে পারিয়া,

তরুণ পাইয়া, খানিক এ ডাল ও ডাল করিয়া বেড়াইল ; কিন্তু, নিতান্ত পীড়াপীড়ি দেখিয়া, অবশেষে, গাছ হইতে নামিয়া পড়িল । তিনিও, সঙ্গে সঙ্গে, নামিয়া পড়িলেন । বিড়াল দৌড়িতে আরম্ভ করিল ; তিনিও পশ্চাৎ পশ্চাৎ দৌড়িলেন । বিড়াল এক রক্ষের কোর্টরে প্রবেশ করিল । ডুবালা, পীড়াপীড়ি করাতে, বিড়াল, কোর্টর হইতে বহির্গত হইয়া, লক্ষ্য দিয়া, তাঁহার হাতের উপর পড়িল, আঁচড়াইয়া সর্ব্বাঙ্গ ক্ষতবিক্ষত করিল, এবং, নখর দ্বারা, ঘাড়ের কতক চামড়া উঠাইয়া লইল । ডুবালা তথাপি উহাকে ছাড়িলেন না । অবশেষে, উহার পা ধরিয়া, এক গাছে বারংবার আছাড় মারিয়া, তিনি উহার প্রাণসংহার করিলেন । ঐ বিড়ালের চর্ম্ম বেচিয়া, যাহা পাইবেন, তাহাতে পুস্তক কিনিতে পারিবেন, এই ভাবিয়া, প্রফুল্লচিত্ত হইয়া, তিনি উহাকে গৃহে আনিলেন ; উহার নখরপ্রহারে, সর্ব্বাঙ্গ যে ক্ষতবিক্ষত হইয়াছিল, তাহাতে কিছুমাত্র ক্লেশবোধ করিলেন না ।

এক দিন, ডুবালা, বনমধ্যে ভ্রমণ করিতে করিতে, একটি সোনার মীল পাইলেন । ঐ

সীলের অনেক মূল্য। ডুবাল, ইচ্ছা করিলে, ঐ সীল আত্মসাৎ করিতে পারিতেন। তিনি অতি হুঃখী ছিলেন বটে ; কিন্তু, লাভের জন্য, অধর্ম বা অন্যায় কর্ম করিবেন, মেরুপ প্রকৃতির লোক ছিলেন না। তিনি পরের দ্রব্য আত্মসাৎ করা অপকর্ম বলিয়া জানিতেন ; এজন্য, ঐ সীল আপনি লইব বলিয়া, এক বারও মনে করিলেন না ; অবিলম্বে আশ্রমে আসিয়া, প্রচার করিয়া দিলেন, আমি এইরূপ একটি সোনার সীল পাইয়াছি ; যাঁহার হারাইয়াছে, তিনি, আমার নিকটে আসিয়া, লইয়া যাইবেন। যে ব্যক্তির সীল হারাইয়াছিল, কয়েক দিন পরে, তিনি উপস্থিত হইলে, ডুবাল তাঁহাকে সেই সীল দিলেন।

ঐ ব্যক্তি, সীল পাইয়া, সন্তুষ্ট হইয়া, ডুবালের পরিচয় লইলেন, তাঁহার অবস্থা, দেখা পড়া শিখিবার যত্ন, ও কত দূর শিক্ষা হইয়াছে, এই সমস্ত অবগত হইয়া, অতিশয় আনন্দিত হইলেন ; এবং, তাঁহাকে বিলক্ষণ পুরস্কার দিয়া, যাইবার সময়, বলিয়া গেলেন, আমি অমুক স্থানে থাকি ; তুমি তথায় গিয়া, মধ্যে মধ্যে, আমার সহিত সাক্ষাৎ করিবে। ডুবাল, যখন

যখন, সাফাৎ করিতে যাইতেন, ঐ ব্যক্তি তাঁহাকে এক একটি টাকা দিতেন । ঐ টাকা ডুবালা অন্য কোনও বিষয়ে খরচ করিতেন না, উহা দ্বারা কেবল পুস্তক কিনিতেন ; আর, ঐ ব্যক্তিও তাঁহাকে, মধ্যে মধ্যে, পুস্তক দিতেন । এই সুযোগে, তাঁহার বিস্তর পুস্তক সংগ্রহ, ও বিস্তর পুস্তক পাঠ, করা হইল ।

যখন ডুবালা তপস্বীদিগের গুরু চরাইতে যাইতেন, সে সময়েও, পড়ায় ক্ষান্ত হইতেন না । তিনি, বনে গুরু ছাড়িয়া দিয়া, পড়িতে বসিতেন । পড়িবার সময়, চারি দিকে, পুস্তক ও ভূচিত্র সকল খোলা থাকিত । তিনি পড়ায় এমন মন নিবিষ্ট করিতেন যে, নিকটে লোক দাঁড়াইলে, অথবা, নিকট দিয়া লোক চলিয়া গেলে, টের পাইতেন না ।

// এক দিবস, ঐ প্রদেশের রাজার পুত্রেরা যুগয়া করিতে গিয়াছিলেন । তাঁহারা, পথহারা হইয়া, ইতস্ততঃ ভ্রমণ করিতে করিতে, ঐ স্থানে উপস্থিত হইলেন ; দেখিলেন, এক দুঃখী রাখাল, গুরু ছাড়িয়া দিয়া, ভূচিত্র ও পুস্তকে বেষ্টিত হইয়া, নিবিষ্ট চিত্তে, পাঠ করিতেছে । দেখিয়া, চমৎকৃত হইয়া, রাজকুমারেরা ডুবালের নিকটে

গেলেন ; এবং, তাঁহার পরিচয় লইয়া, কত দূর শিক্ষা হইয়াছে, তাহার পরীক্ষা করিলেন । রাখাল হইয়া, কি রূপে, এমন লেখা পড়া শিখিল, ইহা জানিবার নিমিত্ত, তাঁহারা সাতিশয় ব্যাঘ্র হইলেন ; এবং, জিজ্ঞাসা করিয়া, সবিশেষ সমুদয় অবগত হইয়া, যেমন বিস্ময়াপন্ন হইলেন, তেমনই আশ্চর্য্যাদিত হইলেন ।

জ্যেষ্ঠ রাজকুমার, আপনার পরিচয় দিয়া, ডুবালাকে কহিলেন, অহে রাখাল ! আর তোমার গুরু চরাইয়া কাজ নাই ; আমার সঙ্গে চল, আমি তোমায় উত্তম কর্মে নিযুক্ত করিব । ডুবালা কোনও কোনও পুস্তকে পড়িয়াছিলেন, যাহারা রাজসংসারে চাকরি করে, তাহারা প্রায় দুষ্চরিত্র হয় ; এ জন্য কহিলেন, আমি আপনকার সঙ্গে যাইব না ; আমার রাজসংসারে চাকরি করিবার বাঞ্ছা নাই ; যত দিন বাঁচিব, এই বনে গুরু চরাইব, সে আমার ভাল ; আমি এ অবস্থায় বেশ সুখে আছি । কিন্তু, আমার, ভাল করিয়া লেখা পড়া শিখিবার, বড় ইচ্ছা আছে ; যদি আপনি, অনুগ্রহ করিয়া, তাহার সুবিধা করিয়া দেন, তাহা হইলে, আমি আপনকার সঙ্গে যাই ।

রাজকুমার, ডুবালের এই উত্তর শুনিয়া, পূর্বে অপেক্ষা অধিক সন্তুষ্ট হইলেন, এবং, ডুবালকে রাজধানীতে লইয়া গিয়া, তাঁহার বিজ্ঞাশিক্ষার উত্তম ব্যবস্থা করিয়া দিলেন । ডুবাল, ইতঃপূর্বেই আপন যত্নে ও পরিশ্রমে, অনেক শিক্ষা করিয়াছিলেন ; এক্ষণে, উত্তম উত্তম অধ্যাপকের নিকট সীতামত উপদেশ পাইয়া, অল্প দিনের মধ্যেই, বিলক্ষণ বিদ্বান্ হইয়া উঠিলেন । রাজা, ডুবালকে সুশীল, ও নানা বিজ্ঞায় নিপুণ দেখিয়া, নিজ পুস্তকালয়ের অধ্যক্ষ, ও পুরাতত্ত্বের অধ্যাপক, এই দুই পদে নিযুক্ত করিলেন । তিনি, এমন উত্তম রূপে, পুরাতত্ত্বের শিক্ষা দিতে লাগিলেন যে, দেশে বিদেশে, তাঁহার নাম খ্যাত হইল ।

এই রূপে, ডুবাল দুই প্রধান পদে নিযুক্ত, ও রাজার অতিশয় প্রিয়পাত্র, হইলেন, এবং, ক্রমে ক্রমে, বিলক্ষণ ধনসঞ্চয় করিলেন । কিন্তু রাখাল অবস্থায়, তাঁহার যেরূপ স্বভাব ও চরিত্র ছিল, তাহার কিছু মাত্র বৈলক্ষণ্য ঘটিল না । রাজসংসারে থাকিলে, ও রাজার প্রিয়পাত্র হইলে, যম্মুখ্যের যে সব দোষ জন্মিয়া থাকে, ডুবালের তাহার কোনও দোষ জন্মে নাই । হীন

অবস্থায় থাকিয়া, ভাল অবস্থা হইলে, অনেকের অহঙ্কার হয় ; কিন্তু, ডুবালের তাঁহা হয় নাই । তিনি, দুঃখের অবস্থায়, যেমন নম্র, যেমন নিরহঙ্কার ছিলেন ; সম্পদের অবস্থাতেও, তেমনই নম্র, তেমনই নিরহঙ্কার ছিলেন । এই সমস্ত গুণ থাকাতে, সকলেই ডুবালকে অতিশয় ভাল বাসিতেন । ডুবালের মৃত্যু হইলে, সকলেই যার পর নাই, দুঃখিত হইয়াছিলেন ।

যাহারা মনে করে, দুঃখে পড়িলে, লেখা পড়া হয় না, তাহাদের, মন দিয়া, ডুবালের মৃত্যু পাঠ করা আবশ্যিক । দেখ, ডুবাল অতি দুঃখীর সম্ভান, অম্প বয়সে, পিতৃহীন ও মাতৃহীন হন ; পেটের ভাতের জন্যে, কত জায়গায় রাখালি করেন ; তথাপি কেমন লেখা পড়া শিখিয়াছিলেন, এবং, কেমন সম্ভান, কেমন সম্পদ প্রাপ্ত হইয়া, শেষ দশায় কেমন সুখে, কেমন সচ্ছন্দে, কালব্যাপন করিয়া গিয়াছেন । যদি তাঁহার লেখা পড়ায় অনুরাগ না জন্মিত, এবং যত ও অম করিয়া, না শিখিতেন ; তাহা হইলে, রাখালি করিয়াই, যাবজ্জীবন, দুঃখে কালব্যাপন করিতে হইত, সন্দেহ নাই ।

## উইলিয়ম রস্কো

উইলিয়ম রস্কো দুঃখীর সন্তান ছিলেন। তাঁহার পিতা, কৃষিকর্ম করিয়া, কষ্টে সংসারযাত্রা সম্পন্ন করিতেন। পুত্রকে ভাল করিয়া লেখা পড়া শিখান, তাঁহার এমন সংস্থান ছিল না। সুতরাং, রস্কো, বাল্যকালে, অতি সামান্যরূপে লেখা পড়া শিখিয়াছিলেন।

রস্কোর পিতার আলুর চাস ছিল। একাকী চাসের সমুদয় কর্ম করিতে পারেন না; এজন্য, তিনি রস্কোকে, বার বৎসর বয়সের সময়, পাঠশালা ছাড়াইয়া, চাসের কর্মে নিযুক্ত করিলেন। তদবধি, কয়েক বৎসর পর্যন্ত, রস্কো ঐ কর্মে নিযুক্ত রহিলেন। তিনি পিতার সঙ্গে চাসের কর্ম করিতেন, এবং, আলু প্রস্তুত হইলে, আলুর বাজরা মাথায় করিয়া, বাজারে গিয়া, বিক্রয় করিয়া আসিতেন।

রস্কো অতি সুশীল ও সুবোধ ছিলেন, অন্য অন্য বালকদিগের মত, দুই ও চঞ্চলস্বভাব ছিলেন না। তিনি লেখা পড়ার এমন যত্নবান



হিলেন, যে, চাঁসের কৰ্ম করিয়া অবসর পাইলেই, অন্য কোনও দিকে যন না দিয়া, কেবল লেখা পড়া করিতেন । তিনি, কখনও, খেলা বা গম্প করিয়া, সময় নষ্ট করেন নাই । অসঙ্গতি বশতঃ, তাঁহার পিতা পুস্তক কিনিয়া দিতে পারিতেন না ; সুতরাং, দৈবযোগে যখন যে পুস্তক জুটিত, রস্কো তাহাই পাঠ করিতেন । এই রূপে, অবসর কালে, কিঞ্চিৎ কিঞ্চিৎ পাঠ করিয়া, লেখা পড়ার তাঁহার একপ্রকার অধিকার জন্মিল । উপদেশ দিবার লোক ও ইচ্ছামত পড়িবার পুস্তক জুটিলে, তিনি, এই সময় মধ্যে, ইহা অপেক্ষা অনেক অধিক শিক্ষা করিতে পারিতেন, সন্দেহ নাই ।

সর্বদা ইচ্ছামত পুস্তক পড়িতে পাইব, এই অভিপ্রায়ে, রস্কো পুস্তকবিক্রয়ের কৰ্ম করিবার ইচ্ছাপ্রকাশ করিলেন । তদনুসারে, তাঁহার পিতা, কাজ শিখিয়ার নিমিত্ত, তাঁহাকে, আপাততঃ, এক পুস্তকবিক্রেতার দোকানে রাখিয়া দিলেন । কিছু দিন তথায় থাকিয়া, পুস্তকবিক্রয় ব্যবসায় তাঁহাকে ভাল লাগিল না । তিনি স্বরায় তথা হইতে চলিয়া আসিলেন । অবশেষে,

তাঁহার পিতা তাঁহাকে, ওকালতি কর্ম্ম শিখাইবার নিমিত্ত, এক উকীলের নিকট রাখিয়া দিলেন ।

এই সময়ে, সৌভাগ্য ক্রমে, হোল্ডন নামক এক ব্যক্তির সহিত, রস্কোর আতিশয় মোহিত্ত জন্মিল । হোল্ডন অতিশয় সুশীল ও বিলক্ষণ বুদ্ধিমান ছিলেন ; এবং, অল্প বয়সেই, নানা ভাষায় ও নানা বিদ্যায় নিপুণ হইয়াছিলেন । রস্কো ও হোল্ডন, উভয়ে প্রায় সমবয়স্ক ; উভয়েই, বিদ্যানুশীলন বিষয়ে, সাতিশয় অনুরক্ত ও সবিশেষ যত্নবান । অবসর কালে, উভয়ে, একত্র হইয়া, লেখা পড়ার চর্চা করিতে আরম্ভ করিলেন ।

এ পর্য্যন্ত, রস্কো, জাতিভাষা ইঙ্গরেজী ভিন্ন, আর কোনও ভাষা জানিতেন না । হোল্ডন, পরামর্শ দিয়া, অন্য অন্য ভাষা শিখিতে আরম্ভ করাইয়া দিলেন, এবং আপনি শিক্ষা দিতে লাগিলেন । এই সুযোগ পাইয়া, রস্কো গ্রীক, লাতিন, ফরাসি, ইটালীয়, এই চারি ভাষার জ্ঞানাপন্ন হইলেন ।

এই রূপে, তিনি, ক্রমে ক্রমে, নানা ভাষায়, ও নানা বিদ্যায়, নিপুণ হইয়া উঠিলেন । একুশ

বৎসর বয়সে, তিনি ওকালতি কর্ষে প্রবৃত্ত হইলেন, এবং, কিছু দিন কর্ষ করিয়া, কিঞ্চিৎ সংস্থান হইলে, বিবাহ করিলেন ।

রক্ষো, ক্রমে ক্রমে, দুই উৎকৃষ্ট ইতিহাস গ্রন্থ লিখিলেন ; ইহাতে, তাঁহার নাম, এক কালে, দেশে বিদেশে, বিখ্যাত হইল । এই দুই গ্রন্থের রচনা বিষয়ে, তিনি বিস্তর পরিশ্রম করিয়াছিলেন । এই দুই গ্রন্থ এমন উৎকৃষ্ট হইয়াছে যে, তদ্বারা তাঁহার নাম চিরস্থায়ী হইতে পারিবেক । ইহা ভিন্ন, তিনি আরও কতিপয় গ্রন্থ লিখিয়া গিয়াছেন ।

ক্রমে ক্রমে, রক্ষো, দেশের মধ্যে, এক জন প্রধান লোক বলিয়া গণ্য হইলেন ; সর্বত্র মান্য হইলেন ; এবং, কি বিদ্বান, কি সম্ভ্রান্ত লোক, সকলের নিকট, সমান আদরণীয় হইলেন । রক্ষো অতিশয় ধর্ম্মশীল লোক ছিলেন, কখনও অধর্ম্ম পথে পদার্পণ করেন নাই ।

দেখ! যিনি, পিতার অসঙ্গতিশ্রুতিঃ, বাল্যকালে, ভাল করিয়া লেখা পড়া শিখিতে পান নাই ; যাহাকে, বার বৎসর বয়সের সময়, পাঠশালা ছাড়িয়া, স্বহস্তে চামের সমস্ত কর্ষ করিতে

হইয়াছিল; যিনি, বাজরা মাথায় করিয়া, বাজারে  
 গিয়া, আলু বেচিয়া আসিতেন; সেই ব্যক্তি,  
 কেবল আন্তরিক যত্নের ও পরিশ্রমের গুণে,  
 নানা ভাষায় ও নানা বিদ্যায় পণ্ডিত হইয়া-  
 ছিলেন; দেশের মধ্যে, এক জন প্রধান লোক  
 বলিয়া গণ্য, ও সর্বত্র সন্মানিত মান্য হইয়া-  
 ছিলেন; এবং গ্রন্থরচনা করিয়া, সর্বত্র বিখ্যাত  
 ও চিরস্মরণীয় হইয়া গিয়াছেন ।

---

## হীন

ইউরোপের অন্তর্বর্তী সাক্সনি প্রদেশে, শেমনিজ নামে এক নগর আছে । ঐ নগরে হীনের জন্ম হয় । হীনের পিতা অতি দুঃখী ছিলেন ; তন্তুবায়ের ব্যবসায় অবলম্বন করিয়া, অতি কষ্টে, বহু পরিবারের ভরণপোষণ করিতেন । পুত্রকে লেখা পড়া শিখান, তাঁহার এমন সঙ্গতি ছিল না । শেমনিজ নগরের নিকটে, একটি সামান্য বিদ্যালয় ছিল, হীনের পিতা তাঁহাকে সেই বিদ্যালয়ে পাঠাইয়া দিলেন । হীন, কিছু দিন তথায় থাকিয়া, সেখানে যত দূর হইতে পারে, লেখা পড়া শিখিলেন ।

অনন্তর, লাতিন পড়িতে তাঁহার অতিশয় ইচ্ছা হইল । ঐ বিদ্যালয়ের শিক্ষকের পুত্র লাতিন জানিতেন । তিনি হীনকে কহিলেন, যদি তুমি আমায় কিছু কিছু দিতে পার, তোমায় লাতিন শিখাই । হীনের পিতার এমন সঙ্গতি ছিল না যে, তিনি পুত্রের লেখা পড়ার নিমিত্ত, মাসে মাসে, কিছু কিছু দিতে পারেন । সুতরাং, হীনের লাতিন শিখার সুবিধা হইল না । তিনি, যার পর নাই, দুঃখিত হইলেন ।

এই সময়ে, এক দিন, হীনের পিতা, কোনও প্রয়োজনে, তাঁহাকে এক আত্মীরের নিকট পাঠাইয়াছিলেন। ল্যাটিন শিখিবার সুযোগ হইল না বলিয়া, হীন সর্বদাই, দুঃখিত মনে, ও জ্ঞান বর্ধনে, থাকিতেন। ঐ আত্মীয় ব্যক্তি হীনকে অতিশয় ভাল বাসিতেন। তিনি, হীনের মুখে জ্ঞান দেখিয়া, কারণ জিজ্ঞাসিলেন, এবং, তাঁহার মুখে সমুদয় শুনিয়া, কহিলেন, তুমি ল্যাটিন পড়িতে আরম্ভ কর ; মাসে মাসে, শিক্ষককে বাহা দিতে হইবেক, তাহা আমি দিব। এই কথা শুনিয়া, হীনের আর আত্মীদের সীমা রহিল না।

এই রূপে, ঐ আত্মীয় ব্যক্তির সাহায্য পাইয়া, হীন দুই বৎসর ল্যাটিন শিখিলেন। পরে, তাঁহার শিক্ষক কহিলেন, আমি যত দূর জানিতাম, তোমায় শিখাইয়াছি ; আমার আর অধিক বিজ্ঞা নাই ; আমি তোমায় অতঃপর শিখাইতে পারিব না। সুতরাং, আপাততঃ, হীনের ল্যাটিনগাঠ স্থগিত রহিল।

এই সময়ে, হীনের পিতা, তাঁহাকে কোনও বিষয়কর্ম্মে প্রবৃত্ত করিবার নিমিত্ত, অতিশয় ব্যগ্র হইলেন। কিন্তু, হীনের নিতান্ত মানস, ভাল

করিয়া লেখা পড়া শিখেন। তাঁহার পিতার  
 বৈয়াকরণ হুৎখের অবস্থা, তাহাতে তিনি গুণের  
 লেখা পড়ার ব্যয়নির্বাহ করিতে পারেন না।  
 ভাগ্যক্রমে, তাঁহাদের আর এক আত্মীয় ছিলেন।  
 লেখা পড়ায় হীনের কেমন যত্ন, হীন কেমন  
 শিখিতে পারেন, ও কত দূর শিখিয়াছেন ;  
 হীনের শিক্ষকের নিকট, এই সমুদয় অবগত  
 হইয়া, ঐ আত্মীয় অতিশয় সন্তুষ্ট হইলেন ; এবং,  
 সেই সন্মত্রে, যে প্রধান বিদ্যালয় ছিল, হীনকে  
 তথায় প্রবিষ্ট করিয়া দিলেন ; কহিলেন, হীনের  
 লেখা পড়া শিখিবার সমুদয় ব্যয় আমি দিব।

হীন, এই রূপে, প্রধান বিদ্যালয়ে প্রবিষ্ট  
 হইয়া, লেখা পড়া করিতে লাগিলেন। কিন্তু  
 অতিশয় অসুবিধা ঘটিতে লাগিল। তাঁহাদের  
 আত্মীয়, সমুদয় ব্যয় দিবার অঙ্গীকার করিয়াও,  
 রূপণ স্বভাব বশতঃ, দিবার সময়ে, বিস্তর  
 গোলযোগ করিতেন। হীন পড়িবার পুস্তক পাই-  
 তেন না, সহায়্যাস্বামীদিগের নিকট, হইতে, পুস্তক  
 চাহিয়া লইয়া, স্বহস্তে লিখিয়া লইতেন, এবং,  
 ঐ লিখিত পুস্তক দেখিয়া, পাঠ করিতেন। এই  
 রূপে, অতি কষ্টে, ঐ স্থানে থাকিয়া, তিনি

কিছু দিন লেখা পড়া করিলেন । পরিশেষে, এই নগরের এক সম্মান ব্যক্তি তাঁহাকে আশ্রয় গৃহের শিক্ষক নিযুক্ত করিলেন । তখন, হীনের কিছু কিছু আর হইতে লাগিল । এই আর দ্বারা, তাঁহার লেখা পড়ার ব্যয়ের বিস্তর আনুকূল্য হইয়াছিল ।

এই রূপে, এই বিদ্যালয়ে কিছু দিন থাকিয়া, হীন দেখিলেন, বিশ্ববিদ্যালয়ে প্রবেশ হইতে না পারিলে, মনের মত লেখা পড়া শিক্ষা হইবেক না । অতএব, তিনি স্থির করিলেন, লিম্বিক নগরে গিয়া, তথাকার বিশ্ববিদ্যালয়ে প্রবেশ হইবেন । আর, তাঁহাদের পূর্বোক্ত আত্মীয় স্বীকার করিলেন, আমিও কিছু কিছু আনুকূল্য করিব । তিনি, এই প্রতিশ্রুত আনুকূল্যের উপর নির্ভর করিয়া, দুইটি মাত্র টাকা মূল্য লইয়া, লিম্বিক নগরে গমন করিলেন, এবং, বিশ্ববিদ্যালয়ে প্রবেশ হইয়া, লেখা পড়া করিতে লাগিলেন ।

কিন্তু, তাঁহাদের আত্মীয়, স্বীকার করিয়াও, যথাসময়ে না পাঠাইয়া, অনেক বিলম্বে, ও বিস্তর বিরক্তিপ্রকাশ করিয়া, খরচ দিতেন, এবং,



ধরচের সঙ্গে, হীন আলস ও অমনোযোগী বলিয়া, ভৎসনা করিয়া পাঠাইতেন। তাহাতে হীনের আহার প্রভৃতি বিষয়ে অতিশয় কষ্ট, ও যেন অতিশয় অমুখ হইত। তিনি যে বাড়িতে বাসা করিয়াছিলেন, ঐ বাড়ীর দানী, দয়া করিয়া, তাঁহার যথেষ্ট আশুকুল্য করিত। এই দানীর আশুকুল্য না পাইলে, তাঁহার ক্রেশের লীমা থাকিত না। বোধ হয়, পুস্তকের অভাবে পাঠবন্ধ হইত, এবং, অনেক দিন, অনাহারেও

জীবিত থাকিয়াও, তিনি, ক্ষণকালের জন্যও পড়ার আলস্য বা ঔদাস্য করেন নাই। এত দুঃখেও যে তাঁহার উৎসাহভঙ্গ হয় নাই, তাহার কারণ এই যে, তিনি ভাবিয়া-ছিলেন, আমি যথেষ্ট কষ্ট পাইতেছি, স্বার্থ বটে ; কিন্তু, লেখা পড়া ছাড়িয়া দিলে, আমার সে কষ্ট দূর হইবেক না ; লাভের মধ্যে, জন্মের মত, মূৰ্খ হইব ; মূৰ্খ হইলে, চির কাল, দুঃখ পাইব ; চির কাল, সকল লোকে, মূৰ্খ বলিয়া, অবজ্ঞা করিবেক ; অতএব, যত কষ্ট হউক না কেন, ভাষা করিয়া লেখা পড়া শিখিব। তিনি

যত কষ্ট পাইতেন, লেখা পড়ার তত অধিক যত্ন করিতেন। ক্রমাগত হয় রাত কাল, সপ্তাহে দুই রাত্রি মাত্র, নিদ্রা ঘাইতেন; আর পাঁচ দিন, সমস্ত রাত্রি অধ্যয়ন করিতেন।

ক্রমে ক্রমে তাঁহার কষ্ট এত অধিক হইয়া উঠিল যে, আর সহ্য হয় না। এই সময়ে, কোনও সম্পন্ন ব্যক্তির বাটীতে, শিক্ষকের প্রয়োজন হইয়াছিল। বিশ্ববিদ্যালয়ের এক অধ্যাপক, হীনের দুঃখ দেখিয়া, দয়া করিয়া, তাঁহাকে ঐ কর্ম দিতে চাহিলেন। ঐ কর্ম স্বীকার করিলে, হীনের এক কালে সকল কষ্ট দূর হইত। কিন্তু, ঐ সম্পন্ন ব্যক্তির বাটী, বিশ্ববিদ্যালয় হইতে, অনেক দূর। তাঁহার বাটীতে কর্ম করিতে গেলে, বিশ্ববিদ্যালয় ছাড়িয়া ঘাইতে হয়; তাহা হইলে, তাঁহার পড়া শুনার সকল সুবিধা যায়। এজন্য, তিনি ঐ কর্ম করিতে সম্মত হইলেন না। তিনি মনে মনে স্থির করিয়া রাখিয়াছিলেন, যত কষ্ট পাই না কেন, লিপ্সিক ছাড়িয়া, স্থানান্তরে ঘাইব না।

কিছু দিন পরে, ঐ অধ্যাপক, লিপ্সিক নগরেই, ঐরূপ আর একটি কর্মের যোগাড়

করিলেন । বিশ্ববিদ্যালয়ে থাকিয়া পড়া শুনা চলিলেক, অথচ কষ্ট দূর হইবেক, এই বিবেচনায়, তিনি ঐ কর্ম স্বীকার করিলেন । ঐ কর্ম স্বীকার করাতে, আপাততঃ, তাঁহার অনেক কষ্ট দূর হইল । কিন্তু, ছাত্রদিগকে শিক্ষা দেওয়াতে, এবং স্বয়ং অহোরাত্র অধ্যয়ন করাতে, তাঁহার অত্যন্ত পরিশ্রম হইতে লাগিল । এই কারণে, তাঁহার এমন উৎকট পীড়া জন্মিল যে, ঐ কর্ম ছাড়িয়া দিতে হইল । ঐ কর্ম করিয়া, যৎকিঞ্চিৎ যাহা তাঁহার হস্তে হইয়াছিল, রোগের সময়, সমুদয় নিঃশেষ হইয়া গেল । যখন সুস্থ হইয়া উঠিলেন, তখন তাঁহার এক কপর্দকও সম্বল ছিল না । সুতরাং, তিনি, পুনর্ব্বার, পূর্ব্বের মত, কষ্টে পড়িলেন, এবং ঋণগ্রস্তও হইলেন ।

ইতঃপূর্বে, তিনি, লাতিন ভাষায়, শ্লোকরচনা করিয়াছিলেন । তাঁহার রচিত শ্লোক দেখিয়া, ডেসভেনের রাজমন্ত্রীরা প্রশংসা করাতে, তাঁহার আশ্বীয়েরা এই বলিয়া তথায় যাইতে পরামর্শ দিলেন যে, সেখানে গেলে, রাজমন্ত্রীরা মহাশ্রুতা করিরা, তোমার যথেষ্ট উপকার করিতে পারিবেন । তদনুসারে, তিনি, ঋণ করিয়া পত্রধরচ

লইয়া ড্রেসডেনে গমন করিলেন । কিন্তু, যে আশায়, ঋণগ্রস্ত হইলেন, এবং, কষ্ট করিয়া, ড্রেসডেনে গেলেন, তাহা সকল হইল না । রাজ-মন্ত্রীরা, প্রথমতঃ, তাঁহাকে আশ্বাস দিয়াছিলেন ; কিন্তু, তদীর, আশ্বাসবাক্য, পরিশেষে, কথামাত্রে পর্যাবসিত হইল ।

অবশেষে, তিনি, নিতান্ত নিরুপায় হইয়া, তত্ৰতা কোনও সম্ভ্রান্ত ব্যক্তির পুস্তকালয়ে, লেখকের কর্মে নিযুক্ত হইলেন । এই কর্ম করিয়া, যাহা পাইতেন, তাহাতে তাঁহার আহারের ক্লেণ্ড ঘুচিত না । কিন্তু, তিনি পরিশ্রমে কাতর ছিলেন না, পুস্তকের অনুবাদ প্রভৃতি অন্য অন্য কর্ম করিতে আরম্ভ করিলেন । এই সকল কর্ম করিয়া, তাঁহার কিছু কিছু লাভ হইতে লাগিল । ঐ লাভ দ্বারা, তিনি পূর্ব ঋণের পরিশোধ করিলেন । পুস্তকালয়ে দুই বৎসর কর্ম করিলে পর, তাঁহার বেতন দ্বিগুণ হইল । কিন্তু, ঐ প্রদেশে, রাজায় রাজায় যুদ্ধ ঘটতে, নানা উপদ্রব উপস্থিত হইল । এজন্য, তাঁহাকে, কর্ম পরিত্যাগ করিয়া, ~~তথায়~~ হইতে পলায়ন করিতে হইল ।

যুদ্ধ উপস্থিত হওয়াতে, ড্রেসডেনে যে সকল উপদ্রব ঘটিয়াছিল, যুদ্ধ শেষ হইলে, ঐ সকল উপদ্রবের নিবারণ হইল। তখন তিনি ড্রেসডেনে প্রতিগমন করিলেন। তাঁহার পঁচুহিরার কিছু পূর্বে, গটিঞ্জনের বিশ্ববিদ্যালয়ে, এক অধ্যাপকের পদ শূন্য হয়। ঐ সময়ে, রস্কিন নামে এক অতি প্রধান পণ্ডিত ছিলেন। বিশ্ববিদ্যালয়ের কর্তৃপক্ষীয়েরা, প্রথমতঃ তাঁহাকে মনোনীত করেন। কিন্তু তিনি, অস্বীকার করিয়া, লিখিয়া পাঠান, হীন নামে এক ব্যক্তি আছেন, তিনি এই কর্মের সম্পূর্ণ যোগ্য পাত্র; আমার মতে, ঐ ব্যক্তি সর্বাপেক্ষা অধিক উপযুক্ত। রস্কিনের সহিত হীনের আলাপ ছিল না। কিন্তু তিনি তাঁহার বিজ্ঞা বুদ্ধির বিষয় সবিশেষ অবগত ছিলেন; এই নিমিত্ত, স্বতঃপ্রযুক্ত হইয়া, ঐ কথা লিখিয়া পাঠান।

রস্কিন এইরূপ লিখিয়া পাঠাইবা মাত্র, বিশ্ববিদ্যালয়ের কর্তৃপক্ষীয়েরা হীনকে ঐ পদে নিযুক্ত করিলেন। তিনি, এত দিন, নানা কষ্টভোগ ও উৎকট পরিশ্রম করিয়া, যে বিজ্ঞোপার্জন করিয়াছিলেন, একগে, তাহা সার্থক হইল।

তিনি যেমন পণ্ডিত, তেমনই সংস্কার ছিলেন । তাঁহার ছাত্রেরা ও যাবতীয় নগরবাসী লোকেরা তাঁহাকে স্বস্ত্র পিতার আয় জ্ঞান করিয়া, যথেষ্ট স্নেহ ও ভক্তি করিতেন । তিনি, পঞ্চাশ বৎসর, নাতিশয় সম্মান পূর্বক, বিশ্ববিদ্যালয়ে অধ্যাপকের কর্ম করেন । তাঁহার মৃত্যু হইলে, সকল লোকেই যৎপরোনাস্তি দুঃখিত হইয়াছিলেন ।

দেখ ! হীন অতি দুঃখীর সম্ভান । তাঁহার পিতা, তত্ত্ববায়ের ব্যবসায় করিয়া, কষ্টে জীবিকা-সম্পাদন করিতেন । কিন্তু হীন, যত্ন ও পরিশ্রম করিয়া, লেখা পড়া শিখিয়াছিলেন বলিয়া, বিনা চেষ্টায়, বিশ্ববিদ্যালয়ের অধ্যাপক হইয়াছিলেন । যদি তিনি, যত্ন ও পরিশ্রম করিয়া, লেখা পড়া না শিখিতেন, তাহা হইলে, কেহ তাঁহার নামও জানিত না । কিন্তু তিনি যে, যার পর নাই ক্রেশে থাকিয়াও, বিদ্যোপার্জন করিয়াছিলেন, কেবল সেই বিদ্যোপার্জনের বলে, চিরস্মরণীয় হইয়াছেন । যত দিন, পৃথিবীতে লেখা পড়ার চর্চা থাকিবেক, তত দিন, তাঁহার নাম দেদীপ্যমান থাকিবেক ।

## জিরম ষ্টোন

এই ব্যক্তি স্কটলও দেশে জন্মগ্রহণ করেন।  
তিনি বৎসর বয়সের সময়, ইঁহার পিতৃবিরোগ  
হয়। ষ্টোনের পিতা কিছু মাত্র সংস্থান করিয়া  
ধাইতে পারেন নাই। তাঁহার জননী, অতি  
কষ্টে, আপনার ও পুত্রের ভরণপোষণ সম্পন্ন  
করিতেন। তিনি পুত্রকে, গ্রামস্থ বিদ্যালয়ে,  
সামান্যরূপে কিছু লেখা পড়া শিখাইয়াছিলেন।

যে রূপে অবস্থা, তাহাতে কিছু কিছু না আনিতে  
পারিলে, কোনও মতেই চলে না; সুতরাং,  
ষ্টোনকে, উপার্জনের চেষ্টায় অল্প বয়সেই,  
বিদ্যালয় পরিত্যাগ করিতে হইল। তিনি, গ্রামে  
গ্রামে, নগরে নগরে, ভ্রমণ করিয়া, ছুরি, কাঁচি,  
ছুঁচ, সুতা, ফিতা প্রভৃতি বিক্রয় করিতে আরম্ভ  
করিলেন। এই সামান্য ব্যবসায় দ্বারা, তিনি  
যথেষ্ট ~~স্বাধীনতা~~ স্বাধীনতা পাইতে লাগিলেন, তাহা দ্বারা,  
জননীর কিছু আনুকূল্য হইতে লাগিল।

“ ডাল করিয়া লেখা পড়া শিখিতে, ষ্টোনের  
অতিশয় বাসনা ছিল। জননী, কোনও রূপেই,  
ভরণপোষণ সম্পন্ন করিতে পারেন না, কেবল

এই কারণে, বিত্তান্ত অনিচ্ছা পূর্বক, তিনি বিত্তালয় পরিত্যাগ করিয়াছিলেন । যে ব্যবসায় অবলম্বন করিলেন, তাহার সঙ্গে লেখা পড়ার কোনও সম্পর্ক নাই । এই নিমিত্তে, ঐ ব্যবসায়ের উপযোগী যে সকল জিনিস পত্র কিনিয়া-  
ছিলেন, সমুদয় বিক্রয় করিলেন, এবং বিক্রয় করিয়া যাহা পাইলেন, তাহাতে কতকগুলি ভাল ভাল পুস্তক কিনিলেন । পুস্তকবিক্রয়ের ব্যবসায় অবলম্বন করিবার তাৎপর্য্য এই যে, ব্যবসায় দ্বারা, যেমন কিছু কিছু লাভ হয়, তাহাও হই-  
বেক, এবং, সর্বদা নানাবিধ পুস্তক নিকটে থাকিলে, ইচ্ছামত পড়াও চলিবেক ।

তৎকালে, স্কটলণ্ডের স্থানে স্থানে, যে মেলা হইত, তথায় জিনিস পত্র লইয়া গেলে, অনা-  
য়াসে বিক্রয় হইত । এই নিমিত্ত, ফোন, দোকান না খুলিয়া, কিংবা গ্রামে গ্রামে না বেড়াইয়া, কেবল মেলার সময়, পুস্তকবিক্রয় করিতে যাই-  
তেন, অবশিষ্ট সময়ে, ক্রমাগত, ইচ্ছামত পুস্তক-  
পাঠ করিতেন ।

এই রূপে, পুস্তকবিক্রয় ব্যবসায় অবলম্বন করিতে, ফোনের লেখা পড়া লিখিবার বিলক্ষণ



সুযোগ হইয়া উঠিল । তিনি, লেখা পড়া শিখিবার নিমিত্ত, এত যত্ন ও এত পরিশ্রম করিতে লাগিলেন যে, অল্প দিনেই, হিব্রু ও গ্রীক, এই দুই ভাষার ব্যুৎপন্ন হইয়া উঠিলেন । অন্তের লাহায্য ব্যতিরেকেই, তিনি এই দুই ভাষা শিখিয়াছিলেন । পরে, লাতিন শিখিতে, তাঁহার অতিশয় ইচ্ছা হইল । তদনুসারে, তিনি লাতিন পড়িতে আরম্ভ করিলেন, এবং অল্প দিনের মধ্যেই, এত দূর শিখিলেন যে, লোকে, দেখিয়া শুনিয়া, চমৎকৃত হইলেন ।

ডাক্তর টলিডেল্ফ নামক এক ব্যক্তি, স্ট্রাসবুর্গের বিশ্ববিদ্যালয়ে, প্রধান অধ্যাপক ছিলেন । এই ব্যক্তি বিখ্যাত পণ্ডিত ও বিখ্যাত বুদ্ধিমান ছিলেন । ইনি, কৌমের লেখা পড়া শিখিবার ছেড়া এবং অসাধারণ বুদ্ধি ও কষতা দেখিয়া, তাঁহাকে, ভাল করিয়া লেখা পড়া শিখাইবার নিমিত্ত, বিশ্ববিদ্যালয়ে প্রবেশ করিয়া দিলেন, এবং তাঁহার সমুদয় খরচ পত্র দিতে লাগিলেন ।

এই রূপে, বিশ্ববিদ্যালয়ে প্রবেশ হইয়া, কৌন, অল্প কালের মধ্যেই, নানা শাস্ত্রে অসাধারণ পণ্ডিত হইয়া উঠিলেন । বিশ্ববিদ্যালয়ের

কি অধ্যাপক, কি ছাত্র, সকলেই তাঁহার বুদ্ধি ও বিজ্ঞার প্রশংসা করিতেন। তিনি ছাত্র ছিলেন, ইহাতে অধ্যাপকেরা বিশ্ববিদ্যালয়ের গৌরব জ্ঞান করিতেন; আর, তাঁহার সঙ্গে অধ্যয়ন করেন, ইহাতে সহাধ্যায়ীরা আপনাদিগের জ্ঞান করিতেন।

চৌন বিশ্ববিদ্যালয়ে, প্রায় তিন বৎসর অধ্যয়ন করিলেন। এই সময়ে, এক লাটিন বিদ্যালয়ে, সহকারী শিক্ষকের পদ শূন্য হইল। বিশ্ববিদ্যালয়ের অধ্যাপকদিগের অনুরোধে, চৌন ঐ পদে নিযুক্ত হইলেন। দুই বৎসর পরে, তিনি প্রধান শিক্ষকের পদেও নিযুক্ত হইয়াছিলেন। আক্ষেপের বিষয় এই যে, অতি অল্প বয়সেই, তাঁহার মৃত্যু হইল। মৃত্যুকালে, তাঁহার বয়ঃক্রম ত্রিশ বৎসর মাত্র হইয়াছিল। তদীয় অকালমৃত্যুতে, সমস্ত লোক, ব্যপন্নো-নাশিত, হুঃখিত হইয়াছিলেন।

## হণ্টর

স্কটলণ্ডের অন্তঃপাতী লেনার্ক প্রদেশে, হণ্টরের  
 জন্ম হয়। তাঁহারা ভাই ভগিনীতে দশটি ছিলেন ;  
 ভ্রাতৃত্বে তিনি সর্বকনিষ্ঠ । বৃদ্ধ বয়সের সর্ব-  
 শেষ পুত্র বলিয়া, তিনি পিতার অত্যন্ত আদরের  
 ছেলে ছিলেন । তাঁহার পিতা, আদর দিয়া,  
 তাঁহাকে এক বারে নষ্ট করিয়াছিলেন । হণ্টর,  
 যা খুলী হইত, তাই করিতেন ; কোনও বিষয়ে,  
 কাহারও উপদেশ অথবা বারণ শুনিতেন না ।  
 কোনও প্রকারের শাসনে থাকা, তাঁহার পক্ষে,  
 বিলক্ষণ ক্লেশকর হইয়া উঠিয়াছিল । সর্বদা আপন  
 ইচ্ছা অনুসারে চলিয়া, এমন বিষম দোষ জন্মিয়া  
 গিয়াছিল যে, তিনি, কোনও বিষয়ে, অধিক ক্ষণ  
 মনোযোগ করিতে পারিতেন না । সুতরাং,  
 বিদ্যালয়ে প্রবেষ্ট হইয়া, তথাকার নিয়ম অনু-  
 সারে চলিয়া, মনোযোগ পূর্বক, লেখা পড়া  
 শিখা তাঁহার অসাধ্য হইয়া উঠিয়াছিল । তদীয়  
 কর্তৃপক্ষীয়েরা, অনেক কষ্টে, তাঁহাকে অতি  
 সামান্তরূপ লেখা পড়া শিখাইয়াছিলেন । সে  
 সময়ে, সকলেই ল্যাটিন শিখিত ; তদনুসারে,

উদ্দেশ্যে লাতিন শিখাইবার জন্যে, বিস্তর চেষ্টা হইয়াছিল । কিন্তু তিনি, কোনও মতে, শিখিলেন না । অনেক বয়স পর্য্যন্ত, তিনি, কেবল খেলা, তামাশা, ও আনন্দ আহ্লাদ করিয়া কাটাইলেন, ভাল করিয়া লেখা পড়া শিখা, অথবা বিষয়কর্মের চেষ্টা দেখা, কিছুই করিলেন না ।

হণ্টরের পিতা সঙ্গতিপন্ন লোক ছিলেন । তাঁহাদের দেশের প্রথা এই, জ্যেষ্ঠ পুত্রই পৈতৃক বিষয়ের অধিকারী হয় ; তদনুসারে, সর্বজ্যেষ্ঠ সমস্ত পিতৃধনের অধিকারী হইলেন । হণ্টর বাপের আদরের ছেলে ছিলেন বটে ; কিন্তু তিনি, যুতুকালে, তাঁহার জন্যে, কোনও ব্যবস্থা করিয়া যান নাই । সুতরাং, কোনও বিষয়কর্ম না করিলে, তাঁহার চলা ভার । দুর্ভাগ্য ক্রমে, তিনি ভাল করিয়া লেখা পড়া শিখেন নাই ; সুতরাং, যে সকল বিষয়কর্মে লেখা পড়া জ্ঞানীর আবশ্যকতা আছে, তাঁহার মেরুপ বিষয়কর্ম করিবার ক্ষমতা ছিল না । তাঁহার এক ভগিনীপতি কাঠরার কর্ম করিতেন ; তাঁহার নিকট নিযুক্ত হইয়া, তিনি মেজ ও কেনারা গড়া

শিথিতে লাগিলেন । নানা প্রকারে দায়গ্রস্ত হওয়াতে, তাঁহার ভগিনীপতির ব্যবসায় রহিত হইয়া গেল ; সুতরাং, হণ্টরেরও কর্ম গেল । তিনি নিজে একরূপ কর্ম চালান, তাঁহার এমন সুবিধা ছিল না ; সুতরাং, অতঃপর কি করিবেন, কিছুই স্থির করিতে পারিলেন না ।

এই সময়ের কিছু দিন পূর্বেই, তাঁহার এক অগ্রজ, লণ্ডন রাজধানীতে, চিকিৎসা ব্যবসাতে প্রবৃত্ত হইয়াছিলেন । ইনি শারীরস্থানবিজ্ঞা বিষয়ে উপদেশ দিতেন । শরীরের কোন স্থানে কিরূপ আছে, শব কাটিয়া, ছাত্রদিগকে সে সমস্ত দেখাইয়া দিতে হইত । উপদেষ্টা স্বয়ং সে সমস্ত সম্পন্ন করিতে পারেন না ; এজন্য, তাঁহার সহকারী থাকিত । হণ্টর, অনেক ভাবিয়া চিন্তিয়া, অবশেষে, আপন অগ্রজের নিকট, পত্র দ্বারা, এই প্রার্থনা করিয়া পাঠাইলেন, আপনি আমাকে আপন সহকারী নিযুক্ত করুন ; যদি না করেন, আমি মৈনিক দলে প্রবিষ্ট হইব । তাঁহার ভ্রাতা সম্মত হইলেন, এবং তাঁহাকে লণ্ডনে বাইতে লিখিয়া পাঠাইলেন ।

হণ্টর, অগ্রজের পত্র পাইয়া, অতিশয়

আহ্লাদিত হইলেন, এবং, অবিলম্বে লগুনে গিয়া, কর্মে নিযুক্ত হইলেন। প্রথম দিনেই, তিনি আপন কর্মে এমন নৈপুণ্য দেখাইলেন যে, তাঁহার ভাতা মাতিশয় সন্তুষ্ট হইয়া কহিলেন, কালক্রমে, তুমি, এ বিবরে, অধিতীর হইতে পারিবে; তখন তোমার চাকরীর আর কোনও ভাবনা থাকিবেক না। হণ্টর, কিছু দিনের পরেই, শারীরস্থানবিজ্ঞার অনুশীলন করিতে আরম্ভ করিলেন; এবং, অল্প দিনের মধ্যেই, ঐ বিজ্ঞায় এমন ব্যুৎপন্ন হইয়া উঠিলেন যে, লগুনে উপস্থিত হইবার পর, এক বৎসর না যাইতেই, উক্ত বিজ্ঞায় শিক্ষা দিবার উপযুক্ত হইয়া উঠিলেন, এবং কতকগুলি ছাত্রকে শিক্ষা দিতে আরম্ভ করিলেন।

অনন্তর তিনি, অল্প দিনের মধ্যেই, চিকিৎসা বিজ্ঞায় ব্যুৎপন্ন হইয়া, চিকিৎসা ব্যবসায় প্রবৃত্ত হইলেন। ইহা ভিন্ন, তাঁহাকে শিষ্যদিগকে শিক্ষাপ্রদান প্রভৃতি অনেক কর্ম করিতে হইত। এই সমস্ত কর্ম করিয়া, অবসর পাইলেই, তিনি বিজ্ঞার অনুশীলন করিতেন। উৎকালে, যে সকল ব্যক্তি শারীরস্থানবিজ্ঞার

বিশারদ ছিলেন, তিনি তাঁহাদের সকলের প্রধান বলিয়া গণ্য হইয়াছিলেন । তাঁহার দ্বারা, চিকিৎসা ও শারীরস্থানবিজ্ঞার যেরূপ উন্নতি হইয়াছে, আর কাহারও দ্বারা, সেরূপ হয় নাই । বস্তুতঃ, এই সমস্ত বিজ্ঞার উন্নতিসাধনের নিমিত্ত, তিনি বিস্তর যত্ন, বিস্তর পরিশ্রম, বিস্তর অর্থব্যয় করিয়াছিলেন । তিনি নানা কর্মে ব্যাপ্ত ছিলেন; সুতরাং, দিবাভাগে, অবসর পাওয়ার সম্ভাবনা ছিল না । অবসরলাভের নিমিত্ত, তিনি নিদ্রার সময়ের সঙ্কোচ করিয়াছিলেন । রাত্রিতে সমুদয়ে চারি ঘণ্টা, দিবসে, আহারের পর, এক ঘণ্টা, এই মাত্র নিদ্রা যাইতেন ।

দেখ ! হুণ্টর কেমন আশ্চর্য্য লোক । বাল্যকালে, পিতা মাতার আদরের ছেলে ছিলেন ; অত্যন্ত আদর পাইয়া, এক বারে নষ্ট হইয়া গিয়াছিলেন, কিছুই লেখা পড়া শিখেন নাই । লেখা পড়া জানিতেন না, এজন্য, উদরের অন্নের নিমিত্ত, অবশেষে, তিনি ছুতরের কর্ম করিয়াছিলেন । যদি তাঁহার ভগিনীপতির কর্ম, রহিত না হইয়া গিয়া, উত্তরোত্তর উত্তম রূপ চলিত, তাহা হইলে, তিনি, এই ব্যবসায়ের পরিপক্ব হইয়াই,

জন্ম কাটাইতেন । তাঁহার ভগিনীপতির কৰ্ম্ম  
 রহিত হইয়া যাওয়াতে, তিনি, নিঃসন্দেহ, অল্প-  
 পায় ভাবিয়া, আপনাকে হতভাগ্য স্থির করিয়া-  
 ছিলেন । কিন্তু, তাঁহার ভগিনীপতির কৰ্ম্ম রহিত  
 হওয়া তাঁহার ও জগতের মোতামোয়র হেতু  
 হইয়াছিল । তাঁহার কৰ্ম্ম রহিত হইল, আর  
 কোনও উপায় নাই ; এই ভাবিয়া, হুটর আপন  
 আত্মার নিকট প্রার্থনা করেন । ঐ সময়ে, তাঁহার  
 বয়স কুড়ি বৎসর । কুড়ি বৎসর বয়সে, লেখা  
 পড়ার আরম্ভ করিয়া, তিনি বিশ্ববিদ্যাত ও চির-  
 অমরীয় হইয়া গিয়াছেন ।



## সিমসন

ইংলণ্ড দেশে, লীফটশায়র নামে এক প্রদেশ আছে। ঐ প্রদেশের অন্তঃপাতী মার্কেটবল-ওয়ার্থ নামক গ্রামে, সিমসনের জন্ম হয়। সিমসনের পিতা তন্তুবায়ব্যবসায়ী ছিলেন। তিনি, প্রথমতঃ, সিমসনকে এক বিদ্যালয়ে অধ্যয়ন করিতে পাঠাইয়া দেন। কিন্তু, তিনি বিদ্যার গৌরব করিতেন না, এবং বিদ্যোপার্জন, মনুষ্যের পক্ষে, আবশ্যক বলিয়া, তাঁহার বোধ ছিল না। এজন্য, পুত্রের স্বকিঞ্চিৎ শিক্ষা হইবু মাত্র, তিনি তাঁহাকে বিদ্যালয় হইতে ছাড়াইয়া লইলেন; এবং তন্তুবায়ের ব্যবসারে নিযুক্ত করিয়া দিলেন।

অধিক লেখা পড়া শিখার, কোনও লাভ নাই, এই বিবেচনা করিয়া, সিমসনের পিতা তাঁহার লেখা পড়া রহিত করিলেন। কিন্তু সিমসন, কিছু দিন বিদ্যালয়ে থাকিয়া, বিদ্যার আব্বাদ পাইয়াছিলেন; সুতরাং, ভাল করিয়া লেখা পড়া শিখিতে, তাঁহার অনুরাগ জন্মিয়াছিল। তিনি, পিতার ইচ্ছা অনুসারে, বিদ্যালয় ছাড়িয়া, তন্তুবায়ের কার্যে প্রবৃত্ত হইলেন বটে; কিন্তু, যথেষ্ট

প্রতিজ্ঞা করিলেন, আমার ভাগ্যে বাহা ঘটুক, ভাল করিয়া লেখা পড়া শিখিব । তিনি, কৰ্ম করিয়া অবসর পাইলেই, পড়িতে বসিতেন ; কোনও ছুতন পুস্তক, কোনও রূপে হস্তগত হইলে, ব্যগ্র চিত্তে তাহা পাঠ করিতেন । কলত্রঃ, তিনি লেখা পড়ায় এত অনুরক্ত হইয়াছিলেন যে, কেবল অবসরকালে পাঠ করিয়া, তাঁহার তৃপ্তি হইত না । কখনও কখনও, কর্মের সময় কৰ্ম না করিয়া, তিনি পুস্তকপাঠে প্রবৃত্ত হইতেন ।

পুত্রের লেখা পড়ায় অনুরাগ দেখিলে, পিতা কত সন্তুষ্ট হন, কত ভাল বাসেন, কত উৎসাহ দেন । কিন্তু সিমসনের পিতা অতি আশ্চর্য্য লোক ছিলেন । তিনি, লেখা পড়ায় পুত্রের এইরূপ অনুরাগ দেখিয়া, অতিশয় বিরক্ত হইলেন । উৎসাহ দেওয়া দূরে থাকুক, বাহাতে সিমসন লেখা পড়া ছাড়েন, তাহার সম্পূর্ণ চেষ্টা দেখিতে লাগিলেন । তিনি লেখা পড়া শিখাকে অলসের কৰ্ম বিবেচনা করিতেন ; সুতরাং, লেখা পড়ায় অধিক যত্ন করাত্তে, তাঁহার মতে, সিমসন অলস ও অকৰ্ম্মণ্য হইয়া বাইতেছিলেন ; এই নিমিত্ত, তিনি সৰ্ব্বদা

ভৎসনা করিতেন। নিমসন, ভৎসনার কাঙ্ক্ষা না হওয়াতে, অবশেষে, তাঁহার পিতা, সাতিশর কুপিত হইয়া, কহিলেন, যদি তুমি ভাল চাও, বই খুলিতে পারিবে না, সারা দিন তাঁতের কৰ্ম করিতে হইবেক।

যে উদ্দেশে, নিমসনের পিতা এই অন্ত্যায় আজ্ঞাপ্রদান করিয়াছিলেন, তাহা সকল হয় নাই। নিমসন লেখা পড়ার যেরূপ অনুরক্ত হইয়াছিলেন, তাহাতে তিনি, এক বারে, লেখা পড়া ছাড়িয়া দিতে পারিবেন কেন। তিনি, কৰ্ম করিয়া অবসর পাইলেই, পড়িতে বসিতেন; তাঁহার পিতাও, পড়িতে দেখিলে, অতিশয় ক্রোধ করিতেন ও গালাগালি দিতেন। ফলতঃ, এই উপলক্ষে, পিতা পুত্রে বিনাক্ষণ বিরোধ ঘটয়া উঠিল। অবশেষে, তাঁহার পিতা, যৎপরোনাস্তি কুপিত হইয়া, কহিলেন, তুমি আমার কথা শুন না; আমি যা বারণ করি, তাই কর; তোমার স্পষ্ট কথায় বলিতেছি, যদি তুমি পড়ার কাস্ত না হও, আমি তোমার বাড়ীতে থাকিতে দিব না।

নিমসন, বাটী হইতে বহিষ্কৃত হইবেন, তাহাও স্বীকার, তথাপি লেখা পড়া ছাড়িবেন

না; সুতরাং, পিতার আলয় হইতে বহিষ্কৃত হইলেন; এবং, নিকটবর্তী কোনও গ্রামে গিয়া, এক গৃহস্থের বাটীতে বাসা করিলেন ।

এই স্থানে তিনি, তাঁতের কার্য করিয়া, আপন অন্ন বস্ত্রের সংগ্রহ করিতেন, এবং কাহারও নিকট পুস্তক চাহিয়া পাইলে, তাহা পাঠ করিতেন । কিছু দিন এই রূপে গত হইল ।

এক দিন, সেই গৃহস্থের বাটীতে, এক গণক উপস্থিত হইল । এই ব্যক্তির সহিত আলাপ হওয়াতে, সিয়সন তাঁহার নিকট অঙ্কবিজ্ঞা ও গণনা শিখিতে আরম্ভ করিলেন । অল্প দিনেই, তিনি গণনাতে এমন নিপুণ হইয়া উঠিলেন যে, সেই প্রদেশের সকল লোক, তাঁহার নিকট, ভাল মন্দ গণাইতে আরম্ভ করিল । এই নুতন ব্যবসায় দ্বারা, তাঁহার বিলক্ষণ লাভ হইতে লাগিল । তখন তিনি, তন্তুবায়ের ব্যবসায় ছাড়িয়া দিয়া, গণকের ব্যবসায় অবলম্বন করিলেন । এই সময়েই তিনি বিবাহ করিলেন ।

এইরূপে, গণকের ব্যবসায় অবলম্বন করিতে, সিয়সনের অন্ন বস্ত্রের ক্লেশ দূর হইল বটে ; কিন্তু বিশিষ্টরূপ বিভোপার্জনের বিলক্ষণ ব্যাঘাত

জন্মিল । গণক হওয়ারতে, পণ্ডিতসমাজে ঘাইবার পথ রুদ্ধ হইল । পণ্ডিতেরা গণকদিগকে প্রতারক বলিয়া জানিতেন, সুতরাং অতিশয় ঘৃণা করিতেন । সিমসন, অল্প বস্ত্রের নিমিত্ত, বিলক্ষণ ক্লেশ পাইয়াছিলেন ; এজন্য, অগত্যা, ঐ ব্যবসায় অবলম্বন করেন । এক্ষণে, তিনি বলহীন করিলেন, কিছু কিছু লাভ হয়, এমন কোনও ব্যবসায় অবলম্বন করিতে পারিলেই, এ জঘন্য ব্যবসায় ছাড়িয়া দিবেন । অবশেষে, একরূপ এক কাণ্ড উপস্থিত হইল যে, তাঁহাকে, এক বারে, গণকের ব্যবসায় ছাড়িয়া দিতে ও স্থানত্যাগ করিতে হইল ।

এক দিন, একটি স্ত্রীলোক, সিমসনের নিকট, কোনও বিষয় গণাইতে আসিয়াছিল । ঐ গণনাতে চণ্ড নামাইবার আবশ্যকতা ছিল । সিমসন, এই অতিপ্রায়ে, এক ব্যক্তিকে, বিকট বেশ ধারণ করাইয়া, নিকটবর্তী খড়ের গাদার পাশে, বসাইয়া রাখিয়াছিলেন যে, চণ্ডকে আহ্বান করিলেই, ঐ ব্যক্তি উপস্থিত হইবেক । গণনার আরম্ভ হইল । সিমসন, আর আর অনুষ্ঠান করিয়া, চণ্ডকে আহ্বান করিয়া মাত্র, ঐ ব্যক্তি, বিকট বেশে,

উপস্থিত হইল । ঐ ব্যক্তির আকার প্রকার দেখিতে এমন ভয়ানক হইয়াছিল যে, সেই ত্রীলোক, অবলোকন মাত্র, ভয়ে অভিভূত ও অচেতন হইল । ঐ উপলক্ষে, তাহার উৎকট রোগ জন্মিল, এবং বুদ্ধিভ্রংশ হইয়া গেল । এই ব্যাপার ঘটাতে, সমস্ত লোক, সিমসনের উপর, এত কুপিত হইল যে, তাঁহাকে, ঐ স্থান পরিত্যাগ করিয়া, পলাইতে হইল ।

এই রূপে, ঐ প্রদেশ হইতে পলায়ন করিয়া, সিমসন, তথা হইতে পনর ক্রোশ দূর ডর্বি নগরে গিয়া অবস্থিতি করিলেন, প্রতিজ্ঞা করিলেন, আর কখনও চণ্ড নামাইবেন না । কিছু কিছু উপার্জন না হইলে, সংসার চলে না ; এজন্য, পুনরায়, তত্ত্ববায়বৃত্তি অবলম্বন করিলেন । তিনি, দিনের বেলায়, তাঁতের কর্ম করিতেন, রাত্রিতে বালকদিগকে শিক্ষা দিতেন । এই রূপে, দিবারাত্রি পরিশ্রম করিয়া, বৎকিঞ্চিৎ মাহা লাভ হইতে লাগিল, তিনি, উদ্ধারা, কফে, আপনার ও পরিবারের ভরণ পোষণ সম্পন্ন করিতে লাগিলেন । কলতঃ, এই সময়ে, তিনি নিরতিশয় পরিশ্রম, ও বার পর নাই ক্লেশভোগ করিয়াছিলেন ।

বাহা হউক, তিনি, অল্প বস্ত্রের নিমিত্ত, যত  
পরিশ্রম করিতেন, বিজ্ঞাপাঠের বিষয়ে, তত-  
পেক্ষা অনেক অধিক পরিশ্রম করিতে লাগিলেন ।  
এই পরিশ্রম দ্বারা, অল্প দিনের মধ্যে, তিনি  
অক্ষশাস্ত্রে ও পদার্থবিজ্ঞায় বিলক্ষণ দৃষ্টিপন্ন হইয়া  
উঠিলেন ; এবং অক্ষশাস্ত্রের একখানি গ্রন্থ  
প্রস্তুত করিলেন । ঐ গ্রন্থ মুদ্রিত করেন, এমন  
ক্ষমতা নাই ; এজন্য, ডর্বি নগরে পরিবার  
রাখিয়া, ইংলণ্ডের রাজধানী লণ্ডন নগরে গমন  
করিলেন । এই সময়ে, তাঁহার বয়ঃক্রম পঁচিশ  
ছাশিশ বৎসর ।

সিমসন, লণ্ডনে উপস্থিত হইয়া, এক অতি  
সামান্য বাসা ভাড়া করিলেন, এবং, দিননির্বাহের  
জন্য, দিনে তাঁতের কার্য করিতে ও রাত্রিতে  
বালকদিগকে অঙ্কবিজ্ঞা শিখাইতে লাগিলেন ।  
অঙ্কবিজ্ঞা অতি দুরূহ বিজ্ঞা । কিন্তু, শিক্ষাদান  
বিষয়ে, সিমসনের এমন অসাধারণ ক্ষমতা ছিল  
যে, তিনি বালকদিগকে, অতি সহজে, ও সুন্দর  
রূপে, বুঝাইয়া দিতেন । এজন্য, অল্প দিনেই  
সকলে তাঁহাকে জানিতে পারিলেন, এবং অনেকে  
তাঁহার আশ্রয় হইলেন । কলতঃ, অনধিক কালের

স্বয়ংই, শিককতাকর্ম দ্বারা, তাঁহার এরূপ লাভ হইতে লাগিল যে, তথায় পরিবার পর্য্যন্ত আনিতে পারিলেন । এই সময়েই, তিনি স্বরচিত অঙ্কবিজ্ঞার গ্রন্থও মুদ্রিত ও প্রচারিত করিলেন ।

এই গ্রন্থের প্রচার অবধি, তাঁহার সৌভাগ্যের দশা উপস্থিত হইল । কিছু দিন পরে, তিনি উলউইচের বিদ্যালয়ে, গণিতবিজ্ঞার অধ্যাপক নিযুক্ত হইলেন । অতঃপর, উত্তরোত্তর, তাঁহার খ্যাতির ও সম্পত্তির বৃদ্ধি হইতে লাগিল । কিন্তু, খ্যাতিলাভ ও সম্পত্তিলাভ করিয়াও, তিনি পরিশ্রমে বিমুগ্ধ হইবেন নাই ; অহোব্রাহ্ম, অধ্যয়নে ও গ্রন্থরচনাতে নিবিষ্ট থাকিতেন । তিনি, অঙ্ক-বিদ্যা ও পদার্থবিদ্যা বিষয়ে, অনেক গ্রন্থ লিখিয়া গিয়াছেন । এই রূপে তিনি, খ্যাতি, সম্পত্তি, ও সম্মান প্রাপ্ত হইয়া, একান্ত বৎসর বয়সে, দেহত্যাগ করেন ।

আন্তরিক যত্ন থাকিলে, ও পরিশ্রম করিলে, অবশ্যই বিজ্ঞালাভ হয় । দেখ ! সিমলনের পিতা তাঁহাকে, অল্প দিন মাত্র বিদ্যালয়ে রাখিয়া, ছাড়াইয়া লইলেন, কিন্তু তিনি লেখা, পড়া ছাড়িলেন না ; তাঁহার পিতা সর্বদা বারণ ও



ভৎসনা করিতে লাগিলেন, তথাপি, তিনি লেখা পড়া ছাড়িলেন না ; অবশেষে, তাঁহার পিতা, কুপিত হইয়া, তাঁহাকে বাটী হইতে বহিষ্কৃত করিয়া দিলেন, তথাপি তিনি লেখা পড়া ছাড়িলেন না ; তৎপরে, কত স্থানে কত কষ্ট পাইলেন, তথাপি তিনি লেখা পড়া ছাড়িলেন না । কলতঃ, লেখা পড়ায় আন্তরিক যত্ন ছিল, ও যথোচিত পরিশ্রম করিয়াছিলেন, বলিয়া, তিনি মনের মত বিদ্যালাভ করিতে পারিয়াছিলেন ; এবং, সেই বিদ্যার বলে, বিলক্ষণ খ্যাতিলাভ, সম্পত্তিলাভ, ও সম্মানলাভ করিয়া গিয়াছেন, এবং চিরস্মরণীয় হইয়াছেন ।

---

## উইলিয়ম হটন

ইংলণ্ডের অন্তঃপাতী ডর্বি নগরে, হটনের জন্ম হয়। হটনের পিতা অতি দ্রুখী ছিলেন। তিনি, পসমপরিষ্করণ করিয়া, জীবিকানির্বাহ করিতেন; সুতরাং, অতি কষ্টে, বৃহৎ পরিবারের ভরণ পোষণ সম্পন্ন হইত। কোনও কোনও দিন, এক্ষণ ঘটত যে, হটনের জননীকে, ছোট ছোট ছেলেগুলির সহিত, সমস্ত দিন উপবাসী থাকিতে হইত; ছেলেগুলি, ক্ষুধার কাতর ও আহ্বারের নিমিত্ত লালায়িত হইয়া, জননীকে অতিশয় ব্যাকুল করিত। সায়ংকালে, কিছু আহ্বারের সামগ্রী উপস্থিত হইলে, তাহারা, ক্ষুধার জ্বালার, কাড়াকাড়ি করিয়া, জননীর ভাগ পর্য্যন্ত খাইয়া কেলিত; জননী, সজল নয়নে, হাত তুলিয়া বসিয়া থাকিতেন। সুতরাং, তাঁহাকে, অনেক দিন, অনাহারেই থাকিতে হইত।

হটনের পিতা যে উপার্জন করিতেন, তাহাতে, তাঁহার স্ত্রী ও পুত্র কন্যাদিগের ভরণ-পোষণ সম্পন্ন হইত না। আবার দুর্ভাগ্য ক্রমে, তিনি সুরাপানে আসক্ত হইয়া উঠিলেন। সর্বদা

তঁড়ির দোকানে পড়িয়া থাকিতেন; যে উপার্জন করিতেন, তাহার অধিকাংশই সুরাপানে ব্যয়িত হইত; সুতরাং, তাঁহার স্ত্রী ও পুত্র কল্যাণের আহ্বারের ক্রেশ আরও অধিক হইয়া উঠিল। হটন কহিয়াছেন, আমি, এক দিন, দিবারাত্রি, উপবাসী ছিলাম; পর দিন, বেলা দুই প্রহরের সময়, ময়দা ও জল ফুটাইয়া, কিঞ্চিৎ মাত্র আহ্বার করিয়াছিলাম।

এরূপ দুর্ব্যবহার ধেরূপ লেখা পড়া হইতে পারে, তাহা অনায়াসে বুঝিতে পারা যায়। স্বাহা হউক, হটনের পিতা হটনকে, তাঁহার পাঁচ বৎসর বয়সের সময়, এক পাঠশালার পাঠাইয়া দেন। ঐ পাঠশালার শিক্ষক আপন ছাত্রদিগকে, লেখা পড়া যত শিখাইতে পারুন না পারুন, বিলক্ষণ প্রহার করিতে পারিতেন। হটন কহিয়াছেন, আমার শিক্ষক লেখা পড়া কিছুই শিখাইতেন না, সর্বদা কেবল, চুল ধরিয়া, দিয়ালে মাথা ঠুকিয়া দিতেন। তিনি, দুই বৎসর, এই পাঠশালার ছিলেন; পরে, তাঁহার পিতা তাঁহাকে, সাত বৎসর বয়সের সময়, পাঠশালা ছাড়াইয়া, এক রেশমের বানকে নিযুক্ত করিয়া দিলেন।

এই স্থানে, হটনের ক্রেশের সীমা ছিল না। তিনি কহিয়াছেন, এই সময়ে, আমাকে, প্রতি-দিন, অতি প্রত্যাশে উঠিতে হইত ; বিশেষ ক্রটি হউক না হউক, মধ্যে মধ্যে, প্রভুর বেত্রপ্রহার সহ্য করিতে হইত ; আর, যত ছোট লোকের ছেলের সহিত বান করিতে হইত। তাহারা লেখা পড়া কিছুই জানিত না, এবং লেখা পড়া শিখিতেও তাহাদের ইচ্ছা ছিল না। এক দিনের বেত্রাঘাতে, পৃষ্ঠের এক স্থান ক্ষত হইয়া গিয়াছিল। পরে, আর এক দিন, প্রহারকালে, বেত্রের অগ্রভাগ লাগিয়া, ঐ ক্ষত এত প্রবল হইয়া উঠিল যে, তাহা দেখিয়া, সকলে এই আশঙ্কা করিতে লাগিলেন, যা ভাল হওয়া কঠিন হইয়া উঠিবেক ; আর, হয় ত, ক্রমে ক্রমে, সমুদয় শিঠ পচিয়া যাইবেক।

হটন, এই রূপে, এই স্থানে, সাত বৎসর কাটাইলেন। পরে, তাঁহার চৌদ্দ বৎসর বয়সের সময়, তাঁহার পিতা তাঁহাকে, তথা হইতে আনিয়া, আপন এক ভ্রাতার দিকৃষ্ট রাখিয়া দিলেন। এই ব্যক্তি, নটিংহাম নগরে, যোজা বোনা ব্যবসায় করিতেন। হটন, পিছ-

বোর নিকটে থাকিয়া, মোহা বোনা শিখিতে লাগিলেন । তাঁহার পিতৃব্য নিতান্ত মন্দ লোক ছিলেন না ; কিন্তু পিতৃব্যপত্নী অতিশয় হুঁহুতা । তিনি আপন স্বামীকে, ও স্বামীর নিকটে যাহারা কর্ম করিত, তাহাদিগকে, অতিশয় আহারের ক্লেশ দিতেন ।

এইরূপ ক্লেশ পাইয়াও, হটন, পিতৃব্যের নিকট, তিন বৎসর অবস্থিতি করিলেন । এক দিবস, তাঁহার পিতৃব্য তাঁহাকে কহিলেন, আজ তোমার এই কর্ম সমাপ্ত করিতে হইবেক । সে দিবস, সে কর্ম সমাপ্ত হইয়া উঠিল না । এজন্য, তাঁহার পিতৃব্য, তাঁহাকে অলম ও অমনোযোগী স্থির করিয়া, প্রথমতঃ, অতিশয় তিরস্কার করিলেন ; পরিশেষে, ক্রোধে অন্ধ ও নিতান্ত নির্দয় হইয়া, বিলক্ষণ প্রহার করিলেন । হটনের মনে যার পর নাই ঘৃণা জন্মিল, ও বিলক্ষণ অপমানবোধ হইল । তখন, তিনি তথা হইতে প্রস্থান করা স্থির করিলেন, এবং, এক দিন, সুযোগ পাইয়া, আপনার কাপড়গুলি ও পিতৃব্যের বাক্স হইতে একটি টাকা পঞ্চখরচ লইয়া, পলায়ন করিলেন ।

এই স্থান হইতে প্রস্থান করিয়া, হটন যেরূপ রুদ্ভ পাইয়াছিলেন, তাহা শুনিলে, অতিশয় দুঃখ উপস্থিত হয় । তিনি, কোনও আশ্রয় না পাইয়া, প্রথম রাত্রি, এক মাঠে শয়ন করিয়া, কাটা-ইলেন, এবং প্রভাত হইলে, পুনরায় প্রস্থান করিলেন । কিন্তু, কোন দিকে যান, কি জন্মাই বা যান, যাইয়াই বা কি করিবেন, তাহার কিছুই ঠিকানা ছিল না ।

তিনি কহিয়াছেন, এই রূপে, সমস্ত দিন ভ্রমণ করিয়া, সায়ংকালে, লিচকিল্ডের নিকট উপস্থিত হইলাম ; নিকটে এক খামার দেখিয়া, মনে করিলাম, আজ, উহার মধ্যে থাকিয়া, রাত্রি কাটাইব । কিন্তু, খামারের দ্বার রুদ্ধ করা ছিল ; সুতরাং, উহার ভিতরে বাইতে পারিলাম না । তখন, পুটলি খুলিয়া, কাপড় পরিলাম, এবং, অবশিষ্ট কাপড় প্রভৃতি বাহা ছিল, সমুদয় বাঁধিয়া, বেড়ার আড়ালে লুকাইয়া রাখিয়া, নগর দেখিতে গেলাম । দুই ঘণ্টা পরে, কিরিয়া আসিয়া, কাপড় ছাড়িলাম । কিছু দূরে আর একটি খামার ছিল ; হয়, ত, এখানে থাকিবার জায়গা পাইব, এই মনে করিয়া,

সেখানে গিয়া দেখিলাম, সেখানেও থাকিবার উপায় নাই; সুতরাং, কিরিয়া আসিলাম; কিরিয়া আসিয়া দেখিলাম, আমার কাপড়ের গুটলি নাই; তখন, হতবুদ্ধি হইয়া, বিস্তর খেদ ও রোদন করিলাম। আমার খেদ ও রোদন শুনিয়া, কতকগুলি লোক সেই স্থানে উপস্থিত হইলেন। তাঁহারা, দেখিয়া শুনিয়া, একে একে, সকলে চলিয়া গেলেন। আমি একাকী, সেই স্থানে বসিয়া, রোদন করিতে লাগিলাম। কোনও ব্যক্তি কখনও এমন বিপদে পড়ে না। বিদেশে আসিয়া, সর্বস্ব হারাইয়া, রাত্রি দুই প্রহরের সময়ে, একাকী মাঠে বসিয়া, গালে হাত দিয়া, কতই ভাবিতে লাগিলাম। এক কপর্দকও ময়ল নাই; কাহারও সহিত আলাপ নাই; লাভের কোনও প্রত্যাশা নাই; সত্ত্বর, লাভের কোনও সুবিধা হইবেক, তাহারও সম্ভাবনা নাই; কাল কি থাকিবে, তাহার সংস্থান নাই; কোথায় যাইবে, কি করিবে, কাহাকে বলিবে, তাহার কোনও ঠিকানা নাই। অনেক কণ ভাবিতে ভাবিতে, নিদ্রাকর্ষণ হইল; তখন ভুতলে শয়ন করিয়া, রাত্রিপান করিলাম।

পর দিন, প্রত্যাহার হইয়া মাত্র, হার্টন, পুনরায় প্রস্থান করিয়া, বরমিংহাম নগরে উপস্থিত হইলেন। এই দিন, অম্ব কোনও আহারসামগ্রী জুটিয়া উঠিল না ; কেবল, পথের ধারে যে সকল ক্ষেত্র ছিল, তাহা হইতে কিছু ফল মূল লইয়া, তিনি সে দিনের ক্ষুধার নিবৃত্তি করিলেন। পরিশেষে, নিতান্ত নিরুপায় দেখিয়া, তিনি এই স্থির করিলেন, পুনরায় পিতার শরণাপন্ন হই, তিনি যা করেন। পিতার নিকট উপস্থিত হইলে, তিনি তাঁহাকে, পুনরায়, তাঁহার সেই নির্দয় পিতৃব্যের নিকটে পাঠাইয়া দিলেন। তাঁহাকে, অগত্যা, তথায় গিয়া, ক্ষমা প্রার্থনা করিতে হইল। পিতৃব্যও, ক্ষমা করিয়া, তাঁহাকে পূর্ববৎ কর্ম করিতে দিলেন।

পিতৃব্যের আবাসে আসিয়া থাকিতে থাকিতে, তাঁহার, ভাল করিয়া লেখা পড়া শিখিতে, অতিশয় ইচ্ছা হইল। তিনি, অবসর কালে, যন দিয়া, লেখা পড়া করিতে লাগিলেন, এবং, যত্নের ও পরিশ্রমের গুণে, অল্প দিনেই, বিলক্ষণ শিখিতে পারিলেন। কিছু দিন পরেই, তিনি শ্লোক রচনা করিতে আরম্ভ করিলেন।



বোজাবোমা কর্বে পরিশ্রম বিস্তর, কিন্তু লাভ  
তাদৃশ নাই; ইহা দেখিয়া, তিনি পিতৃব্যের  
আলয় হইতে চলিয়া গেলেন, এবং আপন এক  
ভগিনীর বাড়িতে গিয়া রহিলেন। এই ভগিনী  
অতিশয় সুশীলা ছিলেন। তিনি ভ্রাতাকে  
অতিশয় ভাল বাসিতেন, এবং, যাহাতে তিনি  
সচ্ছন্দে থাকেন, ও উত্তর কালে যাহাতে তাঁহার  
ভাল হয়, সে বিষয়ে সবিশেষ যত্নবতী ছিলেন।

ইটন, পুস্তকবিক্রয়ের ব্যবসায় করিবার  
নিমিত্ত, অতিশয় ইচ্ছুক হইলেন। নটিংহাম নগ-  
রের সাত ক্রোশ দূরে, সৌথওএল নামে এক  
নগর আছে; তথায় তিনি পুস্তকের দোকান  
খুলিলেন। ইতঃপূর্বে, তিনি বইবাঁধা কর্ম  
শিখিয়াছিলেন; সপ্তাহের মধ্যে কেবল শনিবার,  
সৌথওএলে গিয়া, বই বেচিয়া আনিতেন,  
আর কয়েক দিন বই বাঁধিতেন। তিনি শনিবার  
প্রত্যুষে গাত্রোথান করিতেন, পুস্তকের মোট  
মাঝার করিয়া, সৌথওএলে গিয়া, বেলা  
দশ ঘণ্টার সময়, দোকান খুলিতেন, এবং,  
সমস্ত দিন বিক্রয় করিয়া, সন্ধ্যাতে নটিংহামে  
কিরিয়া আনিতেন।

এই রূপে, হটন, কিছু দিন, অতি কষ্টে, কাটাইলেন ; পরে, অনেকগুলি পুরান পুস্তক মজা পাইয়া, মজুর কিনিয়া লইলেন, এবং, সৌখণ্ডালের দোকান ছাড়িয়া দিয়া, বরমিংহাম নগরে আসিয়া, এক দোকান খুলিলেন । এই স্থানে, কিছু দিন কৰ্ম করিয়া, খরচ বাদে, প্রায় দুই শত টাকা লাভ হইল । এই রূপে কিছু সংস্থান হওয়াতে, তিনি, ক্রমে ক্রমে, কৰ্মের বাহুল্য করিলেন । স্থায়পথে চলিয়া, ও অবি-  
শ্রান্ত পরিশ্রম করিয়া, চারি পাঁচ বৎসরে, তিনি বিলক্ষণ সঙ্গতিপন্ন হইয়া উঠিলেন, এবং বিবাহ করিলেন ।

ইতঃপূর্বে, তিনি, নানা কৰ্মে ব্যাপৃত থাকি-  
রাও, যত্ন ও পরিশ্রমের গুণে, বিলক্ষণ লেখা  
পড়া শিখিয়াছিলেন ; এক্ষণে, নানা কৰ্মে  
সাতিশর ব্যস্ত থাকিয়াও, গ্রন্থরচনার প্রবৃত্ত  
হইলেন, এবং, ক্রমে ক্রমে, নানা গ্রন্থ রচনা  
করিয়া, পণ্ডিতরমাজে গণ্য ও আদরণীয় হইয়া  
উঠিলেন ।

এইরূপে হটন, অশেষবিধ কষ্টভোগ করি-  
রাও, কেবল আপন যত্নে ও পরিশ্রমে, বিজ্ঞা-

লাভ, খ্যাতিলাভ, ও সম্পত্তিলাভ করিয়া, নির-  
মক্কাই বৎসর বয়সে, দেহত্যাগ করেন ।

দেখ ! এই ব্যক্তি কেমন অদ্ভুত মনুষ্য ;  
বিষম ছুরবন্দায় পড়িয়াছিলেন ; তথাপি, কেবল  
আপন যত্নে ও পরিশ্রমে, কেমন বিজ্ঞালাভ,  
কেমন খ্যাতিলাভ, কেমন সম্পত্তিলাভ করিয়া  
গিয়াছেন । কলতঃ, যত্ন ঋকিলে ও পরিশ্রম  
করিলে, সম্ভবমত, বিজ্ঞা, খ্যাতি, সম্পত্তি, সকলই  
লব্ধ হইতে পারে ।

---

## ওগিলবি

ওগিলবি, বাল্যকালে, অতি সামান্যরূপ লেখা পড়া শিখিয়াছিলেন। তাঁহার পিতা ঋণগ্রস্ত ছিলেন ; ঋণের পরিশোধ করিতে না পারাতে, উত্তমর্ণ, বিচারালয়ে অভিযোগ করিয়া, তাঁহাকে কারারুদ্ধ করেন। সুতরাং, নিজে কিছু কিছু উপার্জন করিতে না পারিলে, ওগিলবির চলাভার। কিন্তু তিনি তাদৃশ লেখা পড়া জানিতেন না ; উপায়ান্তর দেখিতে না পাইয়া, অবশেষে নর্তকের ব্যবসায় অবলম্বন করিলেন। এই ব্যবসায়ে তাঁহার বিলক্ষণ নৈপুণ্য জন্মিল। কিছু টাকা হস্তে হইবা মাত্র, তিনি সৰ্ব্বাণ্ডে, পিতাকে কারাগার হইতে মুক্ত করিলেন।

কিছু দিন পরে, কোনও কারণ উপস্থিত হওয়াতে, তাঁহাকে নর্তকের ব্যবসায় পরিত্যাগ করিতে হইল। সুতরাং, তিনি পুনরায় দ্রুখে পড়িলেন। দ্রুখে পড়িয়া, কিছু খরচ করিয়া তিনি পুনরায়, ডবলিন নগরে, একটি সামান্য নাট্যশালা স্থাপিত করিলেন। এই নাট্যশালা দ্বারা, তাঁহার কিছু কিছু লাভের উপক্রম হইল।

কিন্তু, সেই সময়ে, রাজবিরোধ উপলক্ষে, যুদ্ধ উপস্থিত হওয়াতে, তাঁহার লাভের পথ রুদ্ধ হইয়া গেল। নাট্যশালার সমুদয় দেবালয়প্রাঙ্গণ লুপ্ত হইল, এবং তাঁহার নিজের প্রাণসংশয় পর্য্যন্ত ঘটয়া উঠিল।

এইরূপে, যৎপরোনাস্তি দুঃখে পড়িয়া ও বিপদগ্রস্ত হইয়া, ওগিলবি লওনে কিরিয়া আসিলেন। তথায় তিনি, কেন্সিঙ্গ বিজ্ঞানসংক্রান্ত কোনও ব্যক্তির বিশিষ্টরূপ সাহায্য পাইয়া, ল্যাটিন শিখিতে আরম্ভ করিলেন। এই সময়ে, তাঁহার বয়স চল্লিশ বৎসরের অধিক। ইহার পূর্বে, তাঁহার ভাল করিয়া লেখা পড়া শিখা হয় নাই। তিনি, এত বয়সে শিখিতে আরম্ভ করিয়াও, অল্প দিনেই, ল্যাটিন ভাষার বিলক্ষণ ব্যুৎপন্ন হইয়া উঠিলেন, এবং বর্জিল নামক সুপ্রসিদ্ধ ল্যাটিনকবির রচিত কাব্যের, ইঙ্গরেজী ভাষায়, পদ্মে অনুবাদ করিলেন। এই গ্রন্থ, মুদ্রিত হইয়া, সর্বত্র আদর পূর্বক পরিগৃহীত হইল। গ্রন্থকর্তা কিছু টাকা পাইলেন। এই অর্থলাভ হওয়াতে, তাঁহার অভিশয় উৎসাহ বৃদ্ধি হইল।

গ্রীক ভাষায়, হোমর নামক মহাকাবির রচিত ইলিয়ড ও অডিসি নামক দুই অত্যুৎকৃষ্ট মহাকাব্য আছে। ইংরেজী ভাষায়, পক্ষে ঐ দুই কাব্যের অনুবাদ করিবার নিমিত্ত, ওগিলবির অতিশয় ইচ্ছা হইল। এ পর্যন্ত, তিনি গ্রীক ভাষার বিন্দুবিদগু জানিতেন না। এই সময়ে, তাঁহার চুয়ার, ষৎসর বয়স হইয়াছিল; তথাপি তিনি গ্রীক পাড়িতে আরম্ভ করিলেন, এবং, কিছু দিনের মধ্যেই, গ্রীক ভাষায় বিলক্ষণ বুৎপন্ন হইয়া, ঐ দুই মহাকাব্যের অনুবাদ করিয়া, মুদ্রিত ও প্রচারিত করিলেন। এই দুই গ্রন্থও, পণ্ডিতমাজে, আদর পূর্বক পরিগৃহীত হইল।

ইতোমধ্যে, ওগিলবি, পুনরায় ডবলিন নগরে গিয়া, এক নুতন নাট্যশালা স্থাপিত করিয়া-ছিলেন; তাহাতে তাঁহার যথেষ্ট লাভও হইয়াছিল। বস্তুতঃ, এই সময়ে, ওগিলবি বিলক্ষণ সুখে ও সচ্ছন্দে ছিলেন; অর্থের অভাব জন্য কোনও ক্লেশ পান নাই। অবশেষে, ডবলিন নগরে ভূমি প্রভৃতি যে কিছু সম্পত্তি ছিল, সমুদয় বিক্রয় করিয়া, তিনি পুনরায় লণ্ডনে গিয়া অবস্থিতি করিলেন। তাঁহার বাস করিবার অব্যবহিত

পরেই, লগুনে বিষম অগ্নিদাহ হইল; তাহাতে তাঁহার সর্বস্ব দগ্ধ হইয়া গেল । অগ্নিদাহে সর্বস্বান্ত হওয়াতে, তিনি পুনর্বার, পূর্বের স্থায়, বিষম দুঃখে পড়িলেন ।

এই রূপে, তিনি পুনরায় দুঃখে পড়িলেন বটে; কিন্তু, তাহাতে হতবুদ্ধি বা ভগ্নোৎসাহ হইলেন না; বরং, উৎসাহ ও পরিশ্রম সহকারে, গ্রন্থের অনুবাদ প্রভৃতি কর্ম করিয়া, স্বরায় গুছাইয়া উঠিলেন; কিঞ্চিৎ সংস্থান হইলে, পুনরায় বসতিবাগী নির্মিত করাইলেন, এবং একটি ছাপাখানাও স্থাপিত করিলেন । ছাপাখানা দ্বারা, তিনি পুনরায় সঙ্গতিপন্ন হইয়া উঠিলেন । ছিয়াত্তর বৎসর বয়সে ওগিলবির মৃত্যু হয় ।

দেখ ! ওগিলবি কেমন লোক । তিনি, কত বার, কত দুঃখে ও কত বিপদে পড়িলেন; কিন্তু, উৎসাহ ও পরিশ্রমের গুণে, প্রতি বারেই, গুছাইয়া উঠিলেন; উৎসাহ ও পরিশ্রমের গুণে, চল্লিশ বৎসরের অধিক বয়সে, ল্যাটিন পড়িতে আরম্ভ করিয়া, তাহাতে ব্যুৎপন্ন হইলেন; উৎসাহ ও পরিশ্রমের গুণে, চুয়ান্ন বৎসর বয়সে, গ্রীক পড়িতে আরম্ভ করিয়া, তাহাতেও ব্যুৎপন্ন

হইলেন ; অগ্নিদাহে সৰ্ব্বদাস্ত হইয়া গেল, কিন্তু, উৎসাহ ও পরিশ্রমের গুণে, পুনরায় গৃহাদি-নিৰ্ম্মাণ ও সংস্থান করিয়া, শেষদশা, সুখে ও সমৃদ্ধিতে, অতিবাহিত করিলেন । ফলতঃ, কেবল উৎসাহ ও পরিশ্রমের গুণে, তিনি, বৃদ্ধ বয়সে, বিলক্ষণ লেখা পড়া শিখিয়াছিলেন, এবং, সুখে ও সমৃদ্ধিতে, কালযাপন করিতে পারিয়াছিলেন । যদি তিনি উৎসাহহীন ও পরিশ্রমকাতর হইতেন, তাহা হইলে, অধিক বয়সে লেখা পড়াও হইত না ; এবং হৃৎকেন্দ্রও নীচা থাকিত না ।

অতএব, উৎসাহ ও পরিশ্রম বিজ্ঞা ও মনোভির মূল, তাহার সন্দেহ নাই ।



## লীডন

স্কটল্যান্ডের দক্ষিণ অংশে, ডেন্‌হলম নামে এক গ্রাম আছে। ঐ গ্রামে লীডনের জন্ম হয়। লীডন অতি দুঃখীর সন্তান। তাঁহার পিতা, জন খাটিয়া, প্রতিদিন যাহা পাইতেন, তাহাতেই, অতি কষ্টে, সংসারযাত্রানির্ব্বাহ করিতেন।

লীডনের জন্মের এক বৎসর পরে, তাঁহার পিতা, সপরিবারে, শ্বশুরালয়ে গিয়া, বাস করিলেন। তথায় তিনি ষোল বৎসর থাকেন। এই ষোল বৎসরের কিছু কাল, তিনি মেঘরক্ষকের কর্ম করেন, আর কিছু কাল, শ্বশুরের ক্ষেত্র সংক্রান্ত সমুদয় কর্ম করিয়াছিলেন। তাঁহার শ্বশুর অন্ধ হইয়াছিলেন; সুতরাং, তিনি নিজে ক্ষেত্রের কোনও কর্ম করিতে পারিতেন না।

এই স্থানে লীডন, তাঁহার মাতামহীর নিকটে, লেখা পড়া শিখিতে আরম্ভ করিলেন। কিছু শিখিয়াই, ভাল করিয়া লেখা পড়া শিখিবার নিমিত্ত, তাঁহার নিরতিশয় যত্ন হইল। অল্প দিনের মধ্যেই, তিনি অনেক শিখিয়া ফেলিলেন। কোনও বিদ্যালয়ে প্রবিষ্ট হইতে না

পারিলে, উত্তম রূপে লেখা পড়া শিখা হয় না । কিন্তু, পিতা মাতার অসঙ্গতি প্রযুক্ত, কিছু কাল, তাঁহার সে সুযোগ ঘটিয়া উঠিল না । পরে, দশ বৎসর বয়সের সময়, তিনি এক বিদ্যালয়ে প্রবিষ্ট হইলেন ।

কিছু দিন পরেই, ঐ বিদ্যালয়ের শিক্ষকের মৃত্যু হইল । সুতরাং, লীডনের লেখা পড়া শিখিবার যে সুযোগ ঘটিয়াছিল, তাহা গেল । কিন্তু, ভাল করিয়া লেখা পড়া শিখিবার নিমিত্ত, তাঁহার আন্তরিক যত্ন ও অনুরাগ জন্মিয়াছিল । শিখিবার সুযোগ গেল বলিয়া, তিনি এক বারে লেখা পড়া ছাড়িয়া দিলেন না ; অন্যের সাহায্য না পাইয়াও, স্বয়ং যার পর নাই যত্ন ও পরিশ্রম করিয়া, বিলক্ষণ শিক্ষা করিতে লাগিলেন । ডেনহলম গ্রামে, ডক্কন নামে এক পাদরি ছিলেন । তিনি, কিছু দিন, লীডনকে ল্যাটিন শিখাইলেন ; আর, লীডন, স্বয়ং পরিশ্রম করিয়া, বিনা সাহায্যে, গ্রীক শিখিলেন ।

স্কটলণ্ডের কৃষিজীবীরা যে বালককে বুদ্ধিমান ও লেখা পড়ায় যত্নবান দেখে, তাহাকে পাদরি করিবার নিমিত্ত যত্ন পায় । তাহার কারণ

এই যে, অল্প অল্প কর্তব্য অপেক্ষা, পাদরি  
কর্তব্য অনায়াসে হইতে পারে। লীডনের পিতা,  
তাঁহার লেখা পড়ায় যত্ন ও শিখিবার কষড়া  
দেখিয়া, মনে মনে বাসনা করিয়া ছিলেন,  
তাঁহাকে পাদরি করিবেন। তদনুসারে, তিনি,  
ঐ কর্তব্যের উপযোগী লেখা পড়া শিখাইবার  
নিমিত্ত, পুত্রকে এডিন্‌বরা কলেজে প্রবিষ্ট  
করিয়া দিলেন।

এ পর্যন্ত, লীডন ভাল করিয়া লেখা পড়া  
শিখিবার সুযোগ পান নাই; একণে, কলেজে  
প্রবিষ্ট হইয়া, প্রাণপণে পরিশ্রম করিয়া, মনের  
সাথে, লেখা পড়া শিখিতে লাগিলেন। তিনি  
কিছু কাল কলেজে থাকিয়া, অদ্ভুত পরিশ্রম  
সহকারে, লাতিন, গ্রীক, ফরাসি, জার্মান, স্প্যানিশ,  
ইটালীয়, প্রাচীন আইস্ল্যান্ডিক, হিব্রু, আরবী,  
পারসী, এই দশ ভাষা, এবং ধর্মনীতি ও গণিত-  
বিজ্ঞা, উত্তম রূপে শিখিলেন; এবং পদার্থ-  
বিজ্ঞা, চিকিৎসাবিজ্ঞা প্রভৃতি আর কয়েক বিজ্ঞাও  
একপ্রকার শিখিয়া ফেলিলেন। বাহারা, উত্তর  
কালে পাদরি হইবার অভিপ্রায়ে, বিজ্ঞাত্যাস  
করে, অধ্যাপকেরা, তাহাদের কাছে কিছু না

লইয়া, শিক্ষা দিয়া থাকেন ; এই নিমিত্ত, লীডন  
এত শিখিতে পারিয়াছিলেন ।

এইরূপে, পাঁচ ছয় বৎসর কালেজে থাকিয়া,  
লীডন বিলক্ষণ বিদ্যোপার্জন করিলেন ; কিন্তু  
তাহাকে, অর্থের অসঙ্গতি নিবন্ধন, বিস্তর ক্লেশ  
পাইতে হইয়াছিল । তিনি যে সকল পুস্তক পড়ি-  
তেন, তাহার অধিকাংশই, অন্যের নিকট হইতে  
চাহিয়া আনিতেন । যে সকল পুস্তক চাহিয়া,  
পাওয়া যাইত না, তাহা কিনিতে হইত ; কিন্তু,  
কিনিবার সঙ্গতি ছিল না । যাহা কিছু তাহার  
হস্তে আসিত, আহার প্রভৃতির ক্লেশ সহ  
করিয়াও, তিনি, তাহার অধিকাংশ দ্বারা, পুস্তক  
কিনিতেন । লীডনের কষ্ট দেখিয়া, কালেজের  
এক অধ্যাপক, অনুগ্রহ করিয়া, তাহাকে এক  
পড়ান কর্ম জুটাইয়া দেন । তাহাতে লীডনের  
বিস্তর আনুকূল্য হইয়াছিল । বালকদিগকে শিক্ষা  
দিয়া, যে সময় থাকিত, সে সময়ে তিনি, অনন্য-  
মনা ও অনন্যকর্মী হইয়া, স্বয়ং লেখা পড়া  
করিতেন ।

লীডন, অসাধারণ যত্নে, ও অসাধারণ পরিশ্রমে,  
যে অসাধারণ বিদ্যোপার্জন করিয়া-

হিলেন, তদ্বারা, তিনি জনসমাজে বিলক্ষণ  
 বিখ্যাত হইয়া উঠিলেন । তাঁহার পুস্তিকাময়ের ও  
 বিদ্যালয়ের কথা যে শুনিত, সেই চমৎকৃত  
 হইত ও প্রশংসা করিত । ক্রমে ক্রমে, সেই  
 প্রদেশের অনেক বিদ্বান ও বিদ্যানুরাগী সম্ভ্রান্ত  
 লোকের সহিত, তাঁহার আলাপ হইল । তাঁহারা  
 লক্ষ্যেই তাঁহাকে যথেষ্ট স্নেহ ও সমাদর করিতে  
 লাগিলেন, এবং, যাহাতে তাঁহার ভাল হয়,  
 সে বিষয়ে, সবিশেষ যত্নবান হইলেন ।

কিছু দিন পরে, তিনি পাদবির কৰ্ম্মে নিযুক্ত  
 হইলেন ; কিন্তু সে কৰ্ম্ম, তাঁহার মনোনিীত না  
 হওয়াতে, অল্প দিনের মধ্যেই, ছাড়িয়া দিলেন ;  
 মনে মনে স্থির করিলেন, কাব্যরচনা করিব,  
 এবং, তাহা বিক্রয় করিয়া, বাহা লাভ হইবেক,  
 তাহাতেই জীবিকানির্ব্বাহ করিব । কিন্তু, এই  
 ব্যবসায় দ্বারা যে লাভের সম্ভাবনা ছিল, তাহাতে  
 চলা ভার । এজন্য, তাঁহার আত্মীয়েরা তাঁহাকে  
 কোনও লাভকর বিষয়কৰ্ম্মে নিযুক্ত করিবার  
 চেষ্টা দেখিতে লাগিলেন । তাঁহারা, ভারতবর্ষীয়  
 কার্য্যপরিদর্শক সমাজের নিকট, লীডনের বিদ্যা,  
 বুদ্ধি, ও স্বভাবের পরিচয় দিয়া, তাঁহাকে, কোনও

কর্মে নিযুক্ত করিয়া, ভারতবর্ষে পাঠাইবার  
বিষিত, অনুরোধ করিলেন ।

এই সময়ে, ভারতবর্ষে, ডাক্তরি ভিন্ন অন্য  
কর্মের সুবিধা ছিল না । কিন্তু, চিকিৎসাবিজ্ঞান  
পরীক্ষা দিয়া, উত্তীর্ণ হইয়া, প্রশংসাপত্র না  
পাইলে, কেহ ডাক্তরি কর্ম পাইতে পারিত  
না । ইতঃপূর্বে, লীডন চিকিৎসাবিজ্ঞানও কিছু  
কিছু অল্পশীলন করিয়াছিলেন ; এক্ষণে তিনি,  
অনন্যমনা ও অনন্যকর্মা হইয়া, রীতিমত, উক্ত  
বিজ্ঞা শিখিতে আরম্ভ করিলেন ; এবং, অবি-  
জ্ঞানে পরিশ্রম করিয়া, অল্প দিনের মধ্যেই, ঐ  
বিজ্ঞায় সুশিক্ষিত ও পরীক্ষায় উত্তীর্ণ হইলেন ।  
তিনি, পরীক্ষায় উত্তীর্ণ হইয়া, প্রশংসাপত্র  
পাইবা মাত্র, ডাক্তরি কর্মে নিযুক্ত হইয়া,  
ভারতবর্ষে আসিলেন ।

লীডন, মালদ্রাজে উপস্থিত হইয়া, কর্ম করিতে  
আরম্ভ করিলেন । কিন্তু, সেখানকার জল বায়ু  
তঁাহার অসহ্য হইয়া উঠিল । তিনি, অবিলম্বে,  
নানা রোগে আক্রান্ত হইলেন ; এজন্য, মালদ্রাজ  
পরিত্যাগ করিয়া, তঁাহাকে, কিছু দিন, মালাকা  
উপদ্বীপে থাকিতে হইল । এই স্থানে থাকিয়া,

স্বাস্থ্যলাভ করিয়া, তিনি কলিকাতায় উপস্থিত হইলেন । তৎকালীন গবর্ণর জেনেরল, লর্ড মিল্টো, তাঁহার গুণের পরিচয় পাইয়া, আস্থা দিত চিত্তে, তাঁহাকে, ফোর্ট উইলিয়ম কলেজে, অধ্যাপক নিযুক্ত করিলেন । কিছু দিন পরেই, তিনি চক্ষিণ পরগণার জজের পদে প্রতিষ্ঠিত হইলেন ।

এই পদে অধিক বেতন ছিল । অধিক টাকা পাইলে, অনেকে বারুগিরি করিয়া থাকেন । কিন্তু লীডন মে প্রকৃতির লোক ছিলেন না । তিনি বারুগিরিতে এক পরমাণু ব্যয় করিতেন না ; ন্যায্য ব্যয় করিয়া, বেতনের যাহা অবশিষ্ট থাকিত, তাহার অধিকাংশই, এতদেশীয় ভাষার ও বিজ্ঞার অনুশীলনে, এবং এতদেশীয় পুস্তকের সংগ্রহ বিষয়ে, ব্যয় করিতেন । তিনি, এতদেশীয় ভাষার ও বিজ্ঞার অনুশীলনে, যৎপরোনাস্তি যত্নবান হইয়াছিলেন ; এক মুহূর্তও রুখা নষ্ট না করিয়া, এই বিষয়েই সতত নিবিষ্ট থাকিতেন । এই সময়ে, তিনি এক আত্মীয়কে এই মর্মে পত্র লিখিয়াছিলেন, যদি আমি, সর উইলিয়ম জোন্স অপেক্ষা, ক্ষতগুণ অধিক না লিখিয়া মরি, তাহা হইলে, কেহ বেন, আমার জন্তে, অশ্রুপাত না করে ।

কিছু দিন পরেই, গর্ভবর্ণর জেনেরল, মৈত্র্য লইয়া, জাবাদ্বীপে যুদ্ধ করিতে গেলেন। লীডন ঐ দ্বীপের ভাষা, বিজ্ঞা, রীতি, নীতি অবগত হইবার অভিপ্রায়ে, ঐ সঙ্গে প্রস্থান করিলেন। সেখানকার জল ও বায়ু অতিশয় অস্বাস্থ্যকর। কতিপয় দিবসের পরেই, তাঁহার কম্পজ্বর হইল। তিনি শয্যাগত হইলেন, এবং তিন দিনের জ্বরেই প্রাণত্যাগ করিলেন। এই সময়ে, তাঁহার ছত্রিশ বৎসর মাত্র বয়স হইয়াছিল।

লীডন অতি দুঃখী সন্তান। পিতা মাতার এমন সঙ্গতি ছিল না যে, তাঁহাকে ভাল করিয়া লেখা পড়া শিখান। কিন্তু তিনি কত ভাষা ও কত বিজ্ঞা শিখিয়াছিলেন। অনুধাবন করিয়া দেখ, কেবল অসাধারণ যত্ন ও অসাধারণ পরি-  
শ্রমের গুণেই, লীডন এই সমস্ত ভাষা ও এই সমস্ত বিজ্ঞা শিখিতে পারিয়াছিলেন।



## জেক্বিন্স

কাকরিজাতি অতি নির্বোধ, কিছুই লেখা পড়া জানে না । অনেকে মনে করেন, এই জাতির বুদ্ধি এত অল্প যে, এতজ্ঞাতীয় কেহ কখনও লেখা পড়া শিখিতে পারিবেক না । কিন্তু, এক্ষণে যে রুভান্ত লিখিত হইতেছে, তাহা পাঠ করিলে, এই ভ্রম দূর হইতে পারিবেক ।

ইঙ্গরেজেরা, এক কাকরিরাজের রাজ্যে, বাণিজ্য করিতে যাইতেন । যুরোপীয় লোকেরা লেখা পড়া জানেন বলিয়া, কাকরিজাতি অপেক্ষা সকল অংশে উৎকৃষ্ট; ইহা দেগিয়া, কাকরিরাজ, আপন পুত্রকে লেখা পড়া শিখাইবার নিমিত্ত, নিরতিশয় ব্যগ্র হইলেন, এবং, স্কটলওনিবাসী স্বানফন নামক এক জাহাজী কাপ্তেনের নিকট, প্রস্তাব করিলেন, যদি আপনি আমার পুত্রকে, স্বদেশে লইয়া গিয়া, সুশিক্ষিত করিয়া আনিয়া দেন, তাহা হইলে, আমি আপনকার সবিশেষ পুরস্কার করিব । স্বানফন কাকরিরাজের প্রস্তাবে সম্মত হইলেন ।

তিনি, কাকরিরাজের পুত্রকে স্বদেশে লইয়া

গিয়া, তাঁহার বিদ্যালিকার উচিত যত ব্যবস্থা করিবার চেষ্টা দেখিতেছেন, এমন সময়ে, ইষ্ঠাৎ তাঁহার মৃত্যু হইল । কাকরিরাজের পুত্র বিষম বিপদে পড়িলেন । যাহার সঙ্গে গিয়াছিলেন, তাঁহার মৃত্যু হইল ; এখন তাঁহাকে লাওয়ার পরায়, অথবা লেখা পড়া শিখায়, এমন আর কেহ নাই ; কোথায় যাইবেন, কি করিবেন, তাহার কিছুই ঠিকানা নাই ।

এক পান্থনিবাসে স্থানফনের মৃত্যু হয় । কাকরিরাজের পুত্র সেই স্থানেই কিছু দিন থাকিলেন । সেই পান্থনিবাসের কর্ত্তী, এক বিবি, তাঁহাকে নিতান্ত নিরাশ্রয় দেখিয়া, দয়া করিয়া, সেই কয় দিনের আহার দিয়াছিলেন ।

তদনন্তর, স্থানফনের নিকট কুটুম্ব এক কৃষক, সেই পান্থনিবাসে আসিয়া, কাকরিরাজের পুত্রকে আপন আলয়ে লইয়া গেলেন । এই স্থানে তিনি কিছু দিন, রাখালের কর্ম করিলেন ।

রাজা নিজ পুত্রের কি নাম রাখিয়াছিলেন, তাহা পরিজ্ঞাত নহে । স্থানফন তাঁহার নাম জেক্সিল রাখিয়াছিলেন । তদনুসারে, কাকরিরাজের পুত্র জেক্সিল নামেই প্রসিদ্ধ হইলেন ।

জেক্সিস দৃঢ়কায় হইলে, লেডলা নামক এক ব্যক্তি, তাঁহার উপর সদয় হইয়া, তাঁহাকে আপন আলয়ে লইয়া রাখিলেন । এই স্থানে, তিনি সকল কৰ্ম্মই করিতে লাগিলেন ; কখনও রাখালের কৰ্ম্ম করিতেন, কখনও কৃষকের কৰ্ম্ম করিতেন, কখনও সহস্রের কৰ্ম্ম করিতেন । তিনি অতিশয় মেধাবী ছিলেন বলিয়া, তাঁহার বিশেষ কৰ্ম্ম এই নির্দিষ্ট ছিল, সৰ্ব্বপ্রকার সংবাদ লইয়া, হাইউইক নামক স্থানে যাইতে হইত ।

এই সময়েই, বিদ্যাশিক্ষা বিষয়ে, জেক্সিসের প্রথম অনুরাগ জন্মে । তাঁহার বিলক্ষণ স্মরণ ছিল, পিতা তাঁহাকে, বিদ্যাশিক্ষার নিমিত্ত, পাঠাইয়াছিলেন । কিন্তু, বিদেশে আসিয়া, তিনি যেৰূপ দুরবস্থায় পড়িয়াছিলেন, তাহাতে তাঁহার বিদ্যাশিক্ষার আশা, এক বারেই, উচ্ছিন্ন হইয়া যায় । তথাপি, তিনি মনোমধ্যে স্থির করিয়া ছিলেন, যদি কখনও সুযোগ পাই, যত দূর পারি, পিতার মানস পূর্ণ করিব । একণে, লেডলার পুত্রদিগকে লেখা পড়া করিতে দেখিয়া, তাঁহারও লেখা পড়া শিখিতে অতিশয় ইচ্ছা হইল । তিনি, সুযোগ ক্রমে, ঐ বালকদিগের

নিকটে, উপদেশ লইতে আরম্ভ করিলেন। কিন্তু, দিনের বেলায়, তাঁহার কিছু মাত্র অবসর থাকিত না ; এ নিমিত্ত, নিয়মিত কৰ্ম সম্পন্ন করিয়া, যখন শয়ন করিতে যাইতেন, সেই সময়ে অধিক রাত্রি পর্যন্ত, পাঠাভ্যাস করিতেন, এবং লিখিতে শিখিতেন।

এই রূপে, বিজ্ঞাভ্যাস বিষয়ে তাঁহার অনুরাগপ্রকাশ হইলে, লেডলা তাঁহাকে এক বৈকালিক বিজ্ঞালয়ে প্রবিষ্ট করিয়া দিলেন। জেক্সিস, সমস্ত দিন কৰ্ম করিয়া, বিকালে ঐ বিজ্ঞালয়ে পড়িতে যাইতেন। তিনি, অল্প দিনের মধ্যেই, এমন লেখা পড়া শিখিলেন যে, সকল লোক, দেখিয়া শুনিয়া, চমৎকৃত হইলেন। এই সময়ে এক সমবয়স্ক, বালকের সহিত তাঁহার বন্ধুতা জন্মে। এই বালক বন্ধু, তাঁহার লেখা পড়া শিখিবার বিষয়ে, বিস্তর আনুকূল্য করিয়াছিলেন।

কিছু দিন পরে, জেক্সিস মনজিফ নামক এক ব্যক্তির নিকট পরিচিত হইলেন। এই ব্যক্তি অতি দয়ালু ও অতি সংস্কার ছিলেন। ইনি, পরিচয়দিবস অবধি, জেক্সিসকে যথেষ্ট স্নেহ,

এবং, তাঁহার বিদ্যালয়িকার বিষয়ে, যথেষ্ট আত্ম-  
কল্যাণ করিতেন। এই রূপে, পূর্বোক্ত বালক  
বন্ধুর ও এই দয়ালু ব্যক্তির সাহায্য পাইয়া,  
এবং যৎপরোনাস্তি পরিশ্রম করিয়া, তিনি  
একপ্রকার কৃতবিদ্য হইয়া উঠিলেন।

এই সময়ে, কোনও নিকটবর্তী বিদ্যালয়ে,  
এক শিক্ষকের পদ শূন্য হইল। যাহাদের উপর  
শিক্ষক নিযুক্ত করিবার ভার ছিল, তাঁহারা  
কর্ম্মাকাজ্জীদিগের পরীক্ষার দিননিরূপণ পূর্বক,  
ঘোষণা করিয়া দিলেন। নিরূপিত দিনে,  
জেঙ্কিন্সও, কর্ম্মের আকাজক্ষায়, পরীক্ষা দিতে  
উপস্থিত হইলেন। যত জন পরীক্ষা দিতে  
আসিয়াছিল, পরীক্ষকদিগের বিবেচনায়, তিনি  
সর্ব্বাপেক্ষায় উৎকৃষ্ট হইলেন। তখন তিনি,  
কর্ম্মে নিযুক্ত হইলাম স্থির করিয়া, প্রফুল্ল মনে,  
গৃহে গমন করিলেন।

জেঙ্কিন্স পরীক্ষায় উত্তীর্ণ হইলেও, অধ্যক্ষেরা  
তাঁহাকে ঐ কর্ম্ম দিতে অসম্মত হইলেন। তাঁহারা,  
কাকরিক্রে শিক্ষকের কর্ম্মে নিযুক্ত করা অযুক্ত  
বিবেচনা করিয়া, অন্য এক ব্যক্তিকে ঐ কর্ম্মে  
নিযুক্ত করিলেন। জেঙ্কিন্স মনস্তাপে ত্রিয়মাণ

হইলেন । তিনি পরীক্ষার উত্তীর্ণ হইলেন, তথাপি কর্ম্য পাইলেন না ; ইহা দেখিয়া, সে স্থানের সম্ভ্রান্ত লোকেরা অতিশয় অসন্তুষ্ট হইলেন ; এবং, জেক্সিসের মনস্তাপনিবারণের নিমিত্ত, সেই বিদ্যালয়ের নিকটেই, আর এক বিদ্যালয় স্থাপিত করিয়া, তাঁহাকে শিক্ষক নিযুক্ত করিলেন । জেক্সিস, এই বিদ্যালয়ে, এমন সুন্দর শিক্ষা দিতে লাগিলেন যে, অল্প দিনের মধ্যেই, পূর্বতন বিদ্যালয়ের সমুদয় ছাত্র, তাঁহার নিকটে অধ্যয়ন করিতে আসিল ।

এই রূপে শিক্ষকের কর্ম্মে নিযুক্ত হইরাও, তিনি স্বয়ং শিক্ষা করিতে বিরত হইলেন না । কিঞ্চিৎ দূরে অন্য এক বিদ্যালয় ছিল ; তথাকার অধ্যাপক বিলক্ষণ পণ্ডিত ছিলেন । জেক্সিস যাহা শিক্ষা করিতেন, প্রতি শনিবার, অবাধে, সেই বিদ্যালয়ে গিয়া, তথাকার অধ্যাপকের নিকট, পরীক্ষা দিয়া আসিতেন । হুই তিন বৎসর কর্ম্ম করিয়া, তিনি কিঞ্চিৎ সংস্থান করিলেন ।

এ পর্য্যন্ত, জেক্সিস যাহা শিখিয়াছিলেন, তাহাতেই তাঁহাকে পণ্ডিত বলা যাইতে পারে ।

কিন্তু তিনি তাহাতে সন্তুষ্ট হইলেন না । তাঁহার আরও অধিক শিকার বাসনা হইল । তিনি মনে মনে স্থির করিলেন, কিছু দিনের জন্যে, প্রতি-  
নিধি দিয়া, ছুটী লইব, এবং, কোনও প্রধান  
বিদ্যালয়ে থাকিয়া, ভাল করিয়া, লেখা পড়া  
শিখিব ।

অনন্তর, তিনি, বিদ্যালয়ের অধ্যক্ষবর্গের  
মিকটে, আপন প্রার্থনা জানাইলেন । অধ্যক্ষেরা  
তাঁহার অতিশয় আদর ও সম্মান করিতেন ।  
তাঁহারা, সন্তুষ্ট চিত্তে, তাঁহাকে বিদায় দিলেন ।  
পরে, তাঁহার প্রধান সহায়, পরম দয়ালু, মনত্রিক  
মহাশয়ের সহিত পরামর্শ করিয়া, তিনি, এডিন-  
বরা নগরে গমন করিলেন, এবং, তথাকার  
বিশ্ববিদ্যালয়ে প্রবিষ্ট হইয়া, শীত কয় মাস  
তথায় অবস্থিতি পূর্বক, নানা বিদ্যায় সুশিক্ষিত  
হইলেন ।

বসন্তকাল উপস্থিত হইলে, তিনি তথা হইতে  
প্রত্যাগমন করিলেন, এবং, পুনর্ব্বার, পূর্ব্ববৎ  
স্থানীয়মে, যথোপযুক্ত মনোযোগ সহকারে,  
বিদ্যালয়ের কার্য করিতে লাগিলেন ।

জ্যেষ্ঠ, স্বভাবতঃ, অতি সুশীল ও সচ্চরিত্র,

অতি নম্র ও নিরঙ্কর, এবং ধর্মপরায়ণ ছিলেন। আপনার কর্তব্য কর্মে তাঁহার সম্পূর্ণ মনোযোগ ছিল। কি রাখাল, কি কৃষক, কি শিক্ষক, যখন যে কর্মে নিযুক্ত হইয়াছেন, তিনি সেই কর্মই, অথোচিত যত্ন ও মনোযোগ পূর্বক, সম্পন্ন করিয়াছেন কখনও, কিস্কিন্মাত্র আলস্য বা উদাস্য করেন নাই। এজন্য, তিনি সকল লোকেই বিলক্ষণ আদরণীয় ও স্নেহভাজন হইয়াছিলেন।

সমুদয় বিবেচনা করিয়া দেখিলে, জ্যেষ্ঠিক অতি আশ্চর্য্য লোক। দেখ! লেখা পড়া শিখিবার নিমিত্ত, পিতা তাঁহাকে বিদেশে পাঠাইয়া দেন। যে ব্যক্তি তাঁহার ভার লইয়া ছিলেন, সহসা সেই ব্যক্তির মৃত্যু হওয়াতে, তিনি, এক বারে, নিতান্ত নিরাশ্রয় হইয়া পড়েন; কাহারও সহিত পরিচয় ছিল না; কাহারও কথা বুঝিতে পারিতেন না; অন্ন বস্ত্র দেয়, এমন কেহ ছিল না; কোথায় যাইবেন, কি করিবেন, তাহার কিছুই ঠিকানা ছিল না। যাঁহার, দয়া করিয়া, অন্ন বস্ত্র দিয়াছিলেন, তাঁহাদের বাড়িতে রাখালের কর্ম, কৃষকের কর্ম, মইনের কর্ম



করিতে হইয়াছিল । ফলতঃ, রাজপুত্র হইয়া,  
কেহ কখনও এমন ভ্রমবশ্যায় পড়ে না । কিন্তু,  
ইচ্ছা ও যত্ন ছিল বলিয়া, তিনি কেমন লেখা  
পড়া শিখিয়াছিলেন ।

যাহারা মনে করে, হুংখে পড়িলে লেখা  
পড়া হয় না ; অথবা, যাহারা, হুংখে পড়িয়া,  
লেখা পড়া ছাড়িয়া দেয় ; তাহাদের পক্ষে, মন  
দিয়া, জেক্সিলের রূতাস্ত পাঠ করা আবশ্যক ।

---

## উইলিয়ম গিকোর্ড

ইংলণ্ডের অন্তঃপাতী ডিবনশায়র প্রদেশে, অশ-বর্টন নামে এক নগর আছে। তথায় গিকোর্ডের জন্ম হয়। গিকোর্ডের পিতা সম্ভ্রান্ত ও সম্পন্ন লোক ছিলেন; কিন্তু, উচ্ছৃঙ্খলতা ও অমিতব্যয়িতা দ্বারা, নিতান্ত নিঃস্ব হইয়া গিয়াছিলেন। চার্লস বৎসর বয়স না হইতেই, তাঁহার মৃত্যু হইল। এই সময়ে, গিকোর্ডের তের বৎসর মাত্র বয়স। তিনি অতিশয় দুঃখে পড়িলেন। তাঁহার পিতা সর্বস্ব নষ্ট করিয়া গিয়াছিলেন; সুতরাং, প্রতিপালনের কোনও উপায় ছিল না; এবং, এমন কোনও আত্মীয়ও ছিলেন না যে, তাঁহার প্রতিপালনের ভার লয়েন।

কারলাইল নামে এক ব্যক্তি তাঁহাদের আত্মীয় ছিলেন। তিনি গিকোর্ডকে কহিলেন, আমি তোমার জনমীকে কিছু টাকা ধার দিয়াছিলাম, তিনি তাহা পুরিশোধ করিয়া যান নাই। তিনি, এই ছল করিয়া, অবশিষ্ট যা কিছু ছিল, লুণ্ঠন করিলেন, এবং গিকোর্ডকে আপন বাড়িতে লইয়া রাখিলেন। গিকোর্ড, ইতঃপূর্বে, কিছু লেখা

পড়া শিখিয়াছিলেন ; এক্ষণে, কারলাইল, তাঁহাকে, অধ্যয়নের জন্য, বিদ্যালয়ে পাঠাইয়া দিলেন ; কিন্তু, আর খরচ যোগাইতে পারা যায় না বলিয়া তিন চারি মাসের মধ্যেই, তাঁহাকে বিদ্যালয় হইতে ছাড়াইয়া লইলেন ।

কারলাইল, এই রূপে গিকোর্ডকে পাঠশালা হইতে ছাড়াইয়া লইয়া, কৃষিকর্মে নিযুক্ত করা স্থির করিলেন । কিন্তু, পূর্বে তাঁহার বক্ষঃস্থলে এক আঘাত লাগিয়াছিল, লাজলচালন প্রভৃতি উৎকর্ষ পরিশ্রমের কর্ম তাঁহার দ্বারা সম্পন্ন হওয়া কঠিন । এই নিমিত্ত, কারলাইল কৃষিকর্মে নিযুক্ত করার পরামর্শ পরিত্যাগ করিলেন । পরে, তিনি তাঁহাকে এক ব্যক্তির নিকটে নিযুক্ত করিবার প্রস্তাব করিলেন । এই ব্যক্তি অতি দূর দেশান্তরে বাণিজ্য করিতেন । ইনি গিকোর্ডকে নিযুক্ত করিলে, ইহার বাণিজ্য স্থানে গিয়া, তাঁহাকে থাকিতে হইত । কিন্তু, ঐ ব্যক্তি, গিকোর্ডকে নিতান্ত বালক দেখিয়া, কারলাইলের প্রস্তাবে সন্মত হইলেন না ।

তৎপরে, কারলাইল তাঁহাকে, ব্রিসলহাম বন্দরের এক জাহাজে, নিযুক্ত করিয়া দিলেন ।

গিকোর্ড কহিয়াছেন, আমি, জাহাজে নিযুক্ত হইয়া, যৎপরোনাস্তি ক্লেশ পাইয়াছিলাম; কিন্তু, আমি যে লেখা পড়া করিতে পাইতাম না, সেই ক্লেশ সর্বাপেক্ষায় অধিক বোধ হইয়াছিল। কারলাইল, গিকোর্ডকে জাহাজে নিযুক্ত করিয়া দিয়া, এক বারও তাঁহার সংবাদ লইতেন না।

ত্রিফসহমের জেলের মেয়েরা, কণ্ঠাহে হুই বার, অশবটনে মৎস্যবিক্রয় করিতে যাইত। তাঁহারা, গিকোর্ডের ক্লেশ দেখিয়া, হুঃখিত হইয়া, অশবটনে সকলের কাছে গম্পা করিত। ঐ সকল গম্পা শুনিয়া, গিকোর্ডের অন্য অন্য আত্মীয়েরা কারলাইলের অতিশয় নিন্দা করিতে লাগিলেন। তখন কারলাইল, তাঁহাকে আনিয়া, পুনরায়, এক বিদ্যালয়ে অধ্যয়ন করিতে দিলেন।

গিকোর্ড লেখা পড়ায় বিলক্ষণ অনুরক্ত ছিলেন; এক্ষণে, বিদ্যালয়ে প্রবিষ্ট হইয়া, নিরতিশয় যত্ন ও পরিশ্রম সহকারে, অধ্যয়ন করিতে লাগিলেন। তিনি কহিয়াছেন, আমি, অল্প দিনের মধ্যেই, এত শিখিয়া ফেলিলাম যে, বিদ্যালয়ের প্রধান ছাত্র বলিয়া গণ্য হইলাম, এবং, আবশ্যক যতে, মধ্যে মধ্যে,

শিক্ষকের সহকারিতা করিতে লাগিলাম । যখন যখন সহকারিতা করিতাম, শিক্ষক মহাশয় আমাকে কিছু কিছু দিতেন । আমি মনে মনে স্থির করিলাম, রীতিমত ইহার সহকারী নিযুক্ত হইব ; এবং, অবকাশকালে, অন্য অন্য ছাত্রদিগকে শিক্ষা দিব । এই দ্বিবিধ কর্ম করিয়া, বাহা পাইব, তাহা দ্বারা, অনায়াসে, খাওয়া, পরা, ও লেখা পড়ার ব্যয়নির্বাহ করিতে পারিব । আর, আমার প্রথম শিক্ষক রুদ্ধ ও রুগ্ন হইয়াছিলেন ; সুতরাং, তিনি যে অধিক দিন বাঁচিবেন, এমন সম্ভাবনা ছিল না । আমি মনে মনে আশা করিয়াছিলাম, তাঁহার মৃত্যু হইলে, তদীয় পদে নিযুক্ত হইতে পারিব । এই সময়ে, আমার বয়স পনের বৎসর মাত্র ।

আমি কারলাইলকে এই সকল কথা জানাইলাম । কারলাইল শুনিয়া, অতিশয় অসন্তোষ প্রদর্শন করিয়া, কহিলেন, তুমি যথেষ্ট শিক্ষা করিছ ; যত শিক্ষা করা আবশ্যিক, তাহা অপেক্ষা, তোমার শিক্ষা অনেক অধিক হইয়াছে । আমার বাহা কর্তব্য, করিয়াছি ; এক্ষণে, তোমার এক পাছকাকারের বিপণিতে নিযুক্ত করিয়া দিতেছি ।

তথায় থাকিয়া, মনোযোগ দিয়া, কাজ শিখিলে, উত্তর কালে, অনায়াসে, জীবিকানির্বাহ করিতে পারিবে । আমি শুনিয়া অতিশয় বিষণ্ণ হইলাম । এরূপ জঘন্য ব্যবসায় অবলম্বন করিতে আমার কোনও মতে ইচ্ছা ছিল না । কিন্তু, তৎকালে, লাহস করিয়া, আপত্তি বা অনিচ্ছাপ্রকাশ করিতে পারিলাম না । অনন্তর, ছয় বৎসরের নিমিত্ত, এক পাতৃকাকারের বিপণিতে নিযুক্ত হইলাম ।

এই জঘন্য ব্যবসায়ের উপর আমার অতিশয় ঘৃণা ছিল ; সুতরাং, শিখিবার নিমিত্ত, যত্ন ও প্রয়াস হইত না ; এবং, তাল করিয়া, শিখিতেও পারিতাম না । প্রথম শিককের যত্ন হইলে, তাঁহার কর্মে নিযুক্ত হইতে পারিব, এই যে আশা করিয়াছিলাম, এখনও আমার সে আশা যায় নাই । এজন্য, কর্ম করিয়া অবসর পাইলেই, লেখা পড়া করিতাম ; কিন্তু, দুর্ভাগ্যক্রমে, প্রায় অবসর পাইতাম না । আমার, অবসর কালে, পড়িতে দেখিলে, প্রভু অতিশয় অসন্তুষ্ট হইতেন, এবং, যাহাতে অবসর না পাই, এরূপ চেষ্টা করিতেন । কি অভিপ্রায়ে তিনি এরূপ করেন, আমি প্রথমে তাহা বুঝিতে পারি

নাই । অবশেষে, অনুসন্ধান করিয়া, জানিতে পারিলাম, আমি, যে কর্মের আকাঙ্ক্ষায়, লেখা পড়ায় যত্ন করিতেছিলাম, তিনি, আপন কনিষ্ঠ পুত্রকে ঐ কর্মে নিযুক্ত করিবার নিমিত্ত, সর্বিশেষ সচেষ্ট ছিলেন ।

এই সময়ে, এক স্ত্রীলোক, অনুগ্রহ করিয়া, আমার একখানি বীজগণিত পুস্তক দিয়াছিলেন । এই বীজগণিত তিন্ন, আমার নিকটে, আর কোনও পুস্তক ছিল না ; প্রথমে উপক্রমণিকা না পড়িলে, ঐ পুস্তক পড়িতে পারা যায় না । কিন্তু, আমার নিকটে বীজগণিতের উপক্রমণিকা ছিল না ; আর, ঐ পুস্তক কিনিতে পারি, এমন সম্ভাবনাও ছিল না । আমার প্রভু আপন পুত্রকে একখানি উপক্রমণিকা কিনিয়া দিয়াছিলেন । কিন্তু, তিনি সাবধানে গোপন করিয়া রাখিতেন, আমার, কোনও ক্রমে, ঐ পুস্তক দেখিতে দিতেন না । তিনি যে স্থানে লুকাইয়া রাখিতেন, আমি তাহার সন্ধান পাইরাছিলাম ; সন্ধান পাইয়া, কয়েক দিন, প্রায় সমস্ত রাত্রি জাগিয়া, তাঁহার অভ্যাসমারে, পুস্তক খানি পড়িয়া লইলাম ।

এ পুস্তক পড়িয়া, বীজগণিতপাঠে অধিকারী হইলাম, এবং, যত্ন পূর্বক, পাঠ করিতে আরম্ভ করিলাম; কিন্তু, অতিশয় অসুবিধা ঘটিল। অঙ্ক কসিবার নিমিত্ত, কালি, কলম, ও কাগজ নিতান্ত আবশ্যক। কিন্তু, এই সময়ে, আমার এক পয়সারও সঙ্গতি ছিল না; এবং, এমন কোনও আত্মীয়ও ছিলেন না যে, কিছু দিয়া সাহায্য করেন; সুতরাং, এই সমুদয়ের সংযোগ ঘটিয়া উঠিত না। পরিশেষে, অনেক ভাবিয়া, এক উপায় অবলম্বন করিয়াছিলাম। চর্মখণ্ডকে মক্ষণ করিয়া কাগজ করিয়া লইতাম, এবং ভোঁতা আল লইয়া কলম করিতাম। এই রূপে, মক্ষণ চর্মখণ্ডের উপর, অঙ্ক কসিতে আরম্ভ করিয়াছিলাম। কিন্তু, ইহা অতিশয় গোপনে সম্পন্ন করিতে হইত; কারণ, আমার প্রভু জানিতে পারিলে, নিঃসন্দেহ, বন্ধ করিয়া দিতেন ও তিরস্কার করিতেন।

এ পর্যন্ত, গিকোর্ড যৎপরোনাস্তি ক্লেশভোগ করিয়াছিলেন। অতঃপর তদীয় ক্লেশের কিঞ্চিৎ লাঘব হইল। তাঁহার এক পরিচিত ব্যক্তি শ্লোকরচনা করিয়াছিলেন। তাহা দেখিয়া



তঁাহারও শ্লোকরচনা করিতে ইচ্ছা হয়, এবং, অবিলম্বে, কতকগুলি শ্লোকের রচনা করেন। তিনি আপন সহচরদিগকে স্বরচিত শ্লোকগুলি শুনাইতেন। শুনিয়া, সকলে প্রশংসা করিতেন। কেহ কেহ কিছু পুরস্কার দিতেন। এক দিন, বিকাল বেলায়, তিনি চারি আনা পান। মধ্যে মধ্যে, তিনি, এই রূপে, কিছু কিছু পাইতে লাগিলেন। যঁাহার এক পয়সা পাইবারও উপায় ছিল না ; মধ্যে মধ্যে একরূপ প্রাপ্তি, তঁাহার পক্ষে, ঐশ্বর্যালাভ বলিয়া জ্ঞান হইত। এ পর্য্যন্ত, কালি, কলম, কাগজ, ও পুস্তকের অভাবে, তঁাহার লেখা পড়ার অভিশয় ব্যাঘাত হইত ; এক্ষণে, আবশ্যিক মত, কিছু কিছু কিনিতে আরম্ভ করিলেন। এই রূপে, শ্লোকরচনা ও শ্লোকপাঠ করিয়া, কিঞ্চিৎ কিঞ্চিৎ লাভ, প্রভুর ভয়ে অতি গোপনে, লক্ষ্য করিতে হইত।

দুর্ভাগ্য ক্রমে, এই বিষয়, অধিক দিন, গোপনে রহিল না ; ক্রমে তঁাহার প্রভুর কর্ণগোচর হইল। আমার কাজের ক্ষতি করিয়া, এই লক্ষ্য করিয়া বেড়ায়, এই মনে করিয়া,

তিনি তাঁহার রচিত শ্লোক সকল, এবং কাগজ, কলম, কালি, পুস্তক, সমস্ত কাড়িয়া লইলেন, এবং, যথোচিত তিরস্কার করিয়া, এক বারে তাঁহার লেখা পড়া রহিত করিয়া দিলেন ।

এই সময়েই, তাঁহার প্রথম শিক্ষকের মৃত্যু হইল । তাঁহার স্থলে অন্য এক ব্যক্তি নিযুক্ত হইলেন । এ পর্য্যন্ত, তিনি ঐ পদে নিযুক্ত হইবার যে আশা করিয়াছিলেন, সে আশা এক বারে উচ্ছিন্ন হইয়া গেল । এই দুই ঘটনা দ্বারা, তিনি যৎপরোনাস্তি দুঃখিত ও সর্ব বিষয়ে নিতান্ত নিরুৎসাহ হইলেন । তিনি, মনের দুঃখে, কাহারও নিকটে যাইতেন না, কর্মের সময় কর্ম মাত্র করিতেন, অবশিষ্ট সময়ে, একাকী বিরল বদনে বসিয়া থাকিতেন । ফলতঃ, এই সময়ে, তাঁহার মনোদুঃখের আর সীমা ছিল না ।

গিকোর্ডের মনোদুঃখের বিষয়, কৰ্ণপরাশরায়, কুক্সি নামক এক ব্যক্তির কৰ্ণগোচর হইল । তিনি, গিকোর্ডের মনোদুঃখের কথা শুনিয়া, অতিশয় দুঃখিত হইলেন । গিকোর্ডের মুখে, তদীর অবস্থাসংক্রান্ত আত্মোপাস্ত সমস্ত বৃত্তান্ত অবগত হইয়া, তাঁহার অন্তঃকরণে অতিশয় দয়া

উপস্থিত হইল। তিনি যেন যেন প্রতিজ্ঞা করিলেন, গিকোর্ডের দুঃখ দূর করিব, এবং তাঁহাকে ভাল করিয়া লেখা পড়া শিখাইব। তদনুসারে তিনি, স্বীয় আত্মীয়বর্গের মধ্যে চাঁদা করিয়া, কিছু টাকার সংগ্রহ করিলেন।

যে নিয়মে গিকোর্ড পূর্বোক্ত পাত্রকাকারের বিপণিতে নিযুক্ত হন, তদনুসারে তাঁহাকে, আরও কিছু দিন, তথায় থাকিতে হইত। কুক্সি, তাঁহাকে বাটি টাকা দিয়া, গিকোর্ডকে ছাড়াইয়া আনিলেন, অধ্যয়নের নিমিত্ত, এক বিদ্যালয়ে নিযুক্ত করিয়া দিলেন, এবং তাঁহার সমুদয় ব্যয় নির্বাহ করিতে লাগিলেন। এই সময়ে, গিকোর্ডের বয়স কুড়ি বৎসর। বিদ্যালয় শিক্ষা বিষয়ে গিকোর্ডের অতিশয় যত্ন ছিল, কেবল সুযোগ ঘটে নাই বলিয়া, এ পর্য্যন্ত তিনি উত্তমরূপ শিক্ষা করিতে পারেন নাই। এক্ষণে, দয়ালীল কুক্সি ও তদীয় আত্মীয়বর্গের অনুগ্রহে, বিলক্ষণ শিক্ষা করিতে লাগিলেন। কলতঃ, লেখা পড়া বিষয়ে, তিনি এত যত্ন ও এত পরিশ্রম করিতে লাগিলেন যে, তাঁহার অনুগ্রাহকবর্গ, দেখিয়া শুনিয়া, নিরতিশয় প্রীত হইলেন।

এই রূপে, আন্তরিক বন্ধুত্ব সহকারে, দুই বৎসর দুই মাস অধ্যয়ন করিয়া, তিনি বিশ্ব-বিদ্যালয়ে প্রবিষ্ট হইবার উপযুক্ত হইলেন। কুক্সি তাঁহাকে বিশ্ববিদ্যালয়ে প্রবিষ্ট করিয়া দিলেন। তাঁহার নিশ্চিত বোধ হইয়াছিল, গিকোর্ড, অনায়াসে, বিশ্ববিদ্যালয়ের প্রশংসাপত্র পাইতে পারিবেন; এজন্য, তিনি স্থির করিয়াছিলেন, যত দিন গিকোর্ড, বিশ্ববিদ্যালয়ে অধ্যয়ন করিয়া, পরীক্ষার উত্তীর্ণ হইয়া, প্রশংসাপত্র না পান, তত দিন, সমুদয় ব্যয় দিয়া, তাঁহাকে অধ্যয়ন করাইবেন। কুক্সির নিতান্ত অভিলাষ, গিকোর্ড বিশ্ববিদ্যালয়ের প্রশংসাপত্র পান; কারণ তাহা হইলেই, তিনি, সকলের নিকট, বিদ্বান বলিয়া গণনীয় ও মাননীয় হইবেন।

গিকোর্ড, বিশিষ্টরূপ বিদ্যালান্তের নিমিত্ত, যেমন ব্যগ্র ছিলেন, তাঁহার সৌভাগ্য ক্রমে, তেমনই সুযোগ ঘটয়া উঠিল। তিনি, কুক্সির অভিলাষ পূর্ণ কুরিবার নিমিত্ত, প্রাণপণে যত্ন করিতে লাগিলেন। কিন্তু, আক্ষেপের বিষয় এই গিকোর্ডের প্রশংসাপত্র পাইবার পূর্বেই কুক্সির, মৃত্যু হইল। কিছু দিন পরে, গিকোর্ড প্রশংসা-

পত্র প্রাপ্ত হইলেন। কুকুলি এই সময়ে জীবিত থাকিলে, তাঁহার আত্মাদের ও সুখের সীমা থাকিত না।

কুকুলি গিকোর্ডের প্রতি যেরূপ দয়া ও স্নেহ করিতেন, এবং, তাঁহার ভাল করিবার নিমিত্ত, যেরূপ যত্নবান ছিলেন, অন্য ব্যক্তির সেরূপ হওয়া অসম্ভব। সুতরাং, কুকুলির মৃত্যু, গিকোর্ডের পক্ষে, বজ্রাঘাতের তুল্য হইল। কিন্তু, কুকুলির মৃত্যু হওয়াতে, গিকোর্ড নিতান্ত নিঃসহায় হইলেন না। আসামির নামক এক সম্ভ্রান্ত ব্যক্তি তাঁহার সহায় হইলেন। গিকোর্ডের ভাল করিবার বিষয়ে, ইঁহার, কুকুলি অপেক্ষা, অধিক ক্ষমতা ছিল। এই সম্ভ্রান্ত ব্যক্তির সহায়তাতে, গিকোর্ডের উত্তরোত্তর ভাল হইতে লাগিল। তিনি, ক্রমে ক্রমে, পণ্ডিতসমাজে গণনীয় ও প্রশংসনীয় হইলেন, এবং, বিজ্ঞার বলে, ও পরিশ্রমের গুণে, বিলক্ষণ ধনোপার্জন করিয়া, পরম সুখে কালযাপন করিতে লাগিলেন।

এই রূপে, বিজ্ঞা, খ্যাতি, সুখ, সম্পত্তি প্রাপ্ত হইয়া, গিকোর্ড, একান্তর বৎসর বয়সে, তত্ত্বত্যাগ করেন। তিনি, এক যুহুর্ভের নিমিত্তেও,

বিস্মৃত হন নাই যে, কেবল কুকলির দয়া ও স্নেহই তাঁহার বিদ্যা, সুখ, সম্পত্তি, সমুদয়ের মূল । এই নিমিত্ত, যত্নাকালে, তিনি আপন সমস্ত সম্পত্তি সেই পরম দয়ালু মহাত্মার পুত্রকে দান করিয়া যান । কৃতজ্ঞতার ঈদৃশ দৃষ্টান্ত নিতান্ত বিরল ।

অতি অল্প বয়সে, গিকোর্ডের পিতৃবিরোগ হয় । সহায়, সম্পত্তি, কিছুই ছিল না । তিনি বিংশতি বৎসর বয়স পর্য্যন্ত, কত কষ্ট পাইয়াছিলেন । বাল্যকাল অবধি, ভাল করিয়া লেখা পড়া শিখিবার নিমিত্ত, তাঁহার অতিশয় ইচ্ছা ছিল । কিন্তু কারলাইল, সে বিষয়ে অনুকূল না হইয়া, বরং পূর্বাপর প্রতিকূলতাচরণ করিয়াছিলেন । পরিশেষে, তিনি তাঁহাকে পাঠ্যকাণ্ডের বিপণিতে নিযুক্ত করিয়া দেন । তথায় তাঁহার দ্রবস্বার সীমা ছিল না । বাস্তবিক, তিনি, কুড়ি বৎসর বয়স পর্য্যন্ত, স্বপ্নোপার্জিত ক্রেশে কাল-যাপন করিয়াছিলেন ।

কিন্তু, বিদ্যাশিক্ষা বিষয়ে, তাঁহার পূর্বাপর সমান অনুরাগ ছিল । ভাল করিয়া লেখা পড়া শিখিবার নিমিত্ত, তাঁহার যে আন্তরিক যত্ন

ছিল, এক যুহুর্ভের নিমিত্তে, তাঁহার সে যত্নের  
 অণুমাত্র হ্রাসতা হয় না । এই আন্তরিক যত্নের  
 গুণেই, তিনি বিদ্যালাত, খ্যাতিলাভ, ও সম্পত্তি-  
 লাভ করিতে পারিয়াছিলেন । ইহা যথার্থ বটে,  
 কুক্সি তাঁহার যথেষ্ট আনুকূল্য করিয়াছিলেন,  
 এবং, সেই আনুকূল্য না পাইলে, তিনি কখনও  
 এরূপ কৃতকার্য হইতে পারিতেন না ; কিন্তু,  
 তাঁহার আন্তরিক যত্নই কুক্সির আনুকূল্যের  
 মূল । লেখা পড়া বিষয়ে তাদৃশ আন্তরিক যত্ন  
 না দেখিলে, কুক্সি কখনই তাঁহার প্রতি সেরূপ  
 দয়্যাপ্রকাশ ও স্নেহপ্রদর্শন করিতেন না । অত-  
 এব, দেখ, আন্তরিক যত্ন থাকিলে, বিদ্যা,  
 খ্যাতি, সম্পত্তি, সকলই লব্ধ হইতে পারে ;  
 অবস্থার বৈগুণ্য কদাচ প্রতিবন্ধক হইতে  
 পারে না ।

---

## উইঙ্কিলমন

প্রাণিয়ার অন্তঃপাতী ফেণ্ডল নগরে, উইঙ্কিল-  
মনের জন্ম হয়। ইনি অতি দুঃখীর সন্তান।  
ইহার পিতা, চর্মপাদুকার গঠন ও বিক্রয় দ্বারা,  
সংসারযাত্রানির্বাহ করিতেন। উইঙ্কিলমনকে  
ভাল করিয়া লেখা পড়া শিখাইবার নিমিত্ত,  
তঁাহার অতিশয় অভিলাষ ও যত্ন ছিল। এজন্য  
কষ্টস্বীকার করিয়াও, তিনি তঁাহাকে এক বিদ্যা-  
লয়ে অধ্যয়ন করিতে দিয়াছিলেন। কিন্তু, অল্প  
দিনের মধ্যেই, উৎকট রোগে আক্রান্ত হইয়া,  
তঁাহাকে হাঁস্পাতালে গিয়া থাকিতে হইল।  
সুতরাং, পুত্রের লেখা পড়ার ব্যয়নির্বাহ করিতে  
পারি দূরে থাকুক, সংসার চলাই তার হইয়া  
উঠিল।

অতঃপর, উইঙ্কিলমন কিছু কিছু উপার্জন  
করিতে না পারিলে, তঁাহার পিতার চলা তার।  
বিদ্যাভ্যাসে বিমুগ্ধন দিয়া, উপার্জনের চেষ্টা  
দেখা, তঁাহার পক্ষে, নিতান্ত আবশ্যক হইয়া  
উঠিল। কিন্তু, তঁাহার একান্ত অভিলাষ, ভাল  
করিয়া লেখা পড়া শিদ্ধন। সুতরাং, তিনি



কোনও মতে, বিদ্যালয় পরিত্যাগ করিতে সম্মত ছিলেন না । তিনি সুশীল, পরিশ্রমী, ও লেখা পড়ায় অতিশয় যত্নবান ছিলেন ; এজন্য, তাঁহার অধ্যাপকেরা তাঁহাকে অতিশয় স্নেহ করিতেন । এই সময়ে, তাঁহার, দয়া করিয়া, কিছু কিছু আনুকূল্য করিতে লাগিলেন । আর, তিনি নিজেও, অল্পপাঠী বালকদিগকে শিক্ষা দিয়া, কিছু কিছু পাইতে লাগিলেন ।

এই রূপে, যে আয় হইতে লাগিল, তদ্বারা পিতার ও নিজের সমুদয় ব্যয়ের নির্বাহ হইয়া উঠা কঠিন । সুতরাং, আর কিছু আয় না হইলে চলে না । কিন্তু, তিনি আর কোনও আয়ের সহজ উপায় দেখিতে পাইলেন না । অবশেষে, অনেক ভাবিয়া চিন্তিয়া, রাজিতে, পথে পথে গান করিয়া, ভিক্ষা করিতে আরম্ভ করিলেন । তাহাতে কিছু কিছু আয় হইতে লাগিল, এবং, দিনের বেলায়, বিদ্যালয়ে থাকিয়া নির্বিঘ্নে পড়া শুনাও চলিতে লাগিল । এই রূপে, অধ্যাপকদিগের আনুকূল্য পাইয়া, ও স্বয়ং কিছু কিছু উপার্জন করিয়া, আপনার ও পিতার ভরণ পোষণ সম্পন্ন করিতে লাগিলেন । বোধ

হয়, বিদ্যালয়ের বালকের পক্ষে, ইহা অপেক্ষা  
 অধিকতর কষ্টকর আর কিছুই হইতে পারে না ।  
 দেখ, বিদ্যাশিক্ষা বিষয়ে, উইক্লিমেনের  
 কেমন যত্ন ছিল । কত কষ্ট পাইয়াছিলেন,  
 তথাপি লেখা পড়া ছাড়েন নাই । প্রাণপণে যত্ন  
 ও পরিশ্রম করিয়া, পরিশেষে, তিনি এক জন  
 অতি প্রসিদ্ধ প্রধান পণ্ডিত হইয়াছিলেন ।

---

## উইলিয়ম পার্কেলস

কালের অন্তঃপাতী নর্যণ্ডি প্রদেশে, ডলেরি নামে এক গ্রাম আছে। পার্কেলস সেই গ্রামে জন্মগ্রহণ করেন। একে অতি দুঃখীর সন্তান; তাহাতে আবার, নিতান্ত শৈশব অবস্থায়, পিতৃ-বিরোগ হয়; সুতরাং, ইহার প্রতিপালনের, অথবা লেখা পড়া শিখিবার, কোনও উপায় ছিল না। যাহা হউক, সুযোগ মতে, কিঞ্চিৎ কিঞ্চিৎ শিক্ষা করিয়া, ইনি লেখা পড়ায় এমন অমুরক্ত হইয়াছিলেন যে, পুস্তক লইয়া পড়িতে বসিলে, ক্ষুধা, তৃষ্ণা, কিছুই থাকিত না; তিনি, আহারের সময়, আহার করিতে ভুলিয়া যাইতেন। কিন্তু, দুঃখীর সন্তান বলিয়া, ভাল করিয়া লেখা পড়া শিখিবার সুবিধা হয় না। পারিস নগরে গেলে, লেখা পড়ার সুবিধা হইতে পারিবেক, এই ভাবিয়া, তিনি পারিস যাত্রা করিলেন।

দুর্ভাগ্য ক্রমে, পথে দস্যুদলে আক্রমণ করিল; সঙ্গে যাহা কিছু ছিল, সমুদয় কাড়িয়া লইল; এবং অতিশয় গ্রহণ করিল। শরীরে এত আঘাত লাগিয়াছিল যে, তাঁহাকে, এক হাঁস্পা-

ভালে গিয়া, কিছু কাল থাকিতে হইল। তিনি,  
 তথায় দুই বৎসর থাকিয়া, সুস্থ হইলেন, এবং  
 সুস্থ হইয়া, পুনরায় পারিস যাত্রা করিতে উদ্ভূত  
 হইলেন। কিন্তু, কি খাইয়া, কি পরিয়া, পারিস  
 যাইবেন, তাহার কোনও সংস্থান ছিল না। সেই  
 সময়ে, ক্ষেত্রের শস্য পাকিয়া উঠিয়াছিল। শস্য  
 কাটিবার নিমিত্ত, অনেকের ঠিকা লোক নিযুক্ত  
 করিবার আবশ্যকতা দেখিয়া, তিনি ঐ ঠিকা  
 কর্ম করিতে লাগিলেন; এবং, কয়েক দিন কর্ম  
 করিয়া, পাথেয়ের সংস্থান ও পরিধের বস্ত্রের  
 সংগ্রহ পূর্বক, পারিস যাত্রা করিলেন। পারিসে  
 উপস্থিত হইয়া, তিনি লেখা পড়া শিখিবার ভাল  
 সুযোগ করিতে পারিলেন না; পরিশেষে, অল্প  
 কোনও উপায় না দেখিয়া, এক বিজ্ঞালয়ে পরি-  
 চারক নিযুক্ত হইলেন। এখানে থাকিলে, লেখা  
 পড়ার অনেক সুবিধা হইবেক, এই ভাবিয়া,  
 তিনি ঐ নীচ কর্মে নিযুক্ত হইয়াছিলেন। ফলতঃ,  
 তিনি, ভাল করিয়া লেখা পড়া শিখিবার নিমিত্ত,  
 এত উৎসুক ছিলেন যে, ঐ নীচ কর্ম পাইয়াও,  
 সৌভাগ্যজ্ঞান করিয়াছিলেন। তিনি যে কর্মে  
 নিযুক্ত হইলেন, তাহাতে অবসর পাওয়া দুর্ঘট;

অত্যুৎপন্ন মাত্র যে অয়লর পাইতেন, তাহাতেই তিনি কিছু কিছু শিক্ষা করিতে লাগিলেন ।

কিন্তু, লেখা পড়ার আন্তরিক যত্ন থাকার এমনই গুণ যে, এই ব্যক্তি, ক্রমে ক্রমে, এক জন অতি প্রধান পণ্ডিত হইয়া উঠিলেন । তাঁহার অসাধারণ বিজ্ঞার বিষয় ক্রান্তির অধিপতি প্রথম ফ্রান্সিসের গোচর হইলে, তিনি তাঁহাকে, আরবী, পারসী প্রভৃতি গ্রন্থ সংগ্রহের ভার দিয়া, লিবার্ট প্রদেশে পাঠাইয়া দিলেন । পঞ্চেলস সে বিষয়ে সবিশেষ বিবেচনা ও নৈপুণ্য-প্রদর্শন করাত্তে, প্রধান রাজমন্ত্রী তাঁহার প্রতি অতিশয় সন্তুষ্ট হইলেন । তিনি, লিবার্ট হইতে প্রত্যাগমন করিয়া, ঐ রাজমন্ত্রীর অনুগ্রহে, এক অতি প্রধান পদে নিযুক্ত হইলেন ।

---

## এড্রিয়ন

ছলওর অন্তঃপাতী উইট্রিষ্ট নগরে, এড্রিয়নের জন্ম হয়। ইঁহার পিতা অতি-দুঃখী ছিলেন ; নৌকানির্মাণের ব্যবসায় করিয়া, কষ্টে সংসার-নির্বাহ করিতেন। তাঁহার নিতান্ত ইচ্ছা, পুত্রকে ভাল করিয়া লেখা পড়া শিখান। কিন্তু, লেখা পড়ার ব্যয়নির্বাহ করেন, এমন সংস্থান ছিল না। লুবেনের বিশ্ববিদ্যালয়ে, কতকগুলি বালককে বিনা ব্যয়ে, শিক্ষা দিবার নিয়ম ছিল ; সুযোগ করিয়া, তিনি এড্রিয়নকে তথায় প্রবেশ করিয়া দিলেন।

এই স্থলে অধ্যয়নকালে, এড্রিয়নের রাত্রিতে প্রদীপ জালিয়া পড়িবার সজ্জা ছিল না। কিন্তু, লেখা পড়ার অতিশয় অনুরাগ ছিল বলিয়া, তিনি আলস্তে কালহরণ করিতেন না। গিরজার দ্বারে, ও পথের ধারে, সমস্ত রাত্রি, আলো জলিত। তিনি, পুস্তক লইয়া, তথায় গিয়া, সেই আলোকে পাঠ করিতেন। এড্রিয়ন, এইরূপ কষ্টে থাকিয়াও, কেবল আন্তরিক যত্নে গুণে, অসাধারণ বিজ্ঞোপার্জন করিলেন, এবং,

পাদরির কর্মে নিযুক্ত হইলেন । উত্তরোত্তর, তাঁহার পদবৃদ্ধি হইতে লাগিল । তিনি, বিদ্যান ও সচ্চরিত্র বলিয়া, সর্বত্র প্রতিষ্ঠিত হওয়াতে, স্পেনের রাজকুমারের শিক্ষকতাকার্যে নিযুক্ত হইলেন, এবং, সেই রাজকুমার সত্রাট হইলে পর, তাঁহার সহায়তায়, পরিশেষে, পোপের সিংহাসনে অধিকৃত হইলেন ।

লেখা পড়ায় আন্তরিক যত্ন থাকার কি অনির্বচনীয় গুণ ! দেখ, যে ব্যক্তি অতি দুঃখীর সন্তান ; যাহার, রাত্রিতে প্রদীপ জালিয়া, পড়িবার সজ্জা ছিল না ; সেই ব্যক্তি, কেবল আন্তরিক যত্ন ছিল বলিয়া, কেমন অসাধারণ বিজ্ঞোপার্জন করিয়াছিলেন, এবং, অসাধারণ বিজ্ঞার বলে, কেমন উচ্চ পদে অধিকৃত হইয়াছিলেন ।

---

## প্রিডো

ইংলণ্ডের আন্তঃপাতী করনওয়ারাল প্রদেশে, পডফো নামে এক নগর আছে। ঐ নগরে প্রিডোর জন্ম হয়। ইঁহার পিতার এমন সঙ্গতি ছিল না যে, ইঁহাকে ভাল করিয়া লেখা পড়া শিখান। কোনও বিজ্ঞালয়ে রাখিয়া, সামান্যরূপ কিছু শিখানও, তাঁহার পক্ষে, দুঃসাধ্য হইয়াছিল। কিন্তু প্রিডোর লেখা পড়ায় আন্তরিক যত্ন ছিল। বাটীতে থাকিয়া, লেখা পড়া শিখিবার কোনও সুযোগ না হওয়াতে, তিনি অক্সফোর্ড নগরে গমন করিলেন; তথায়, অন্য কোনও উপায় না দেখিয়া, অবশেষে, এক বিজ্ঞালয়ে পাচকের সহকারী নিযুক্ত হইলেন।

ঐদৃশ নীচ কর্ণে নিযুক্ত হইবার অভিপ্রায়, এই যে, ঐ কর্ণের বেতন দ্বারা, বাসাখরচ চলিয়া যাইবেক। তিনি, এই রূপে, বাসাখরচের সংস্থান করিলেন, এবং, কর্ম করিয়া, যখন অবসর পাইতেন, সেই সময়ে, কিছু কিছু অধ্যয়ন করিতে লাগিলেন। ক্রমে ক্রমে, এই রূপে, অধ্যয়ন করিয়া, সুযোগমতে, অক্সফোর্ডের



বিশ্ববিদ্যালয়ে প্রবিশিত হইয়া, তিনি বিলক্ষণ  
 বিদ্যোপার্জন করিলেন। বিশ্ববিদ্যালয়ে থাকিতে  
 থাকিতেই, তিনি এক গ্রন্থ লিখিলেন। ঐ গ্রন্থে  
 তাঁহার বিলক্ষণ পাণ্ডিত্যপ্রকাশ হইয়াছিল।  
 তদনন্তর, তাঁহার উপর রাজমন্ত্রীদিগের অসু-  
 দৃষ্টি হইল। তাঁহাদের সহায়তায়, পরিশেষে,  
 তিনি ওয়ারসেক্রেটারি বিশপের পদে অধিষ্ঠিত  
 হইলেন।

---

## ডাক্তর এডাম

স্কটলণ্ডের অন্তঃপাতী য়োরে নামক প্রদেশে, রেকোর্ড নামে এক গ্রাম আছে। ঐ গ্রামে এডামের জন্ম হয়। এই ব্যক্তি অতি দুঃখী সন্তান। কিন্তু, ভাল করিয়া লেখা পড়া শিখিবার নিমিত্ত, তাঁহার অতিশয় ইচ্ছা ছিল। যৎকালে, তিনি এডিনবরায় অধ্যয়ন করিতে যান, তখন তাঁহার অতিশয় দুঃখের দশা। তিনি, অল্প ভাড়ায়, একটি ছোট ঘর লইয়া, তাহাতেই অতি কষ্টে থাকিতেন; নিতান্ত অসঙ্গতি প্রযুক্ত, আহারেরও অতিশয় ক্লেশ পাইতেন; প্রায়ই, কাঁচা ময়দা গুলিয়া খাইয়া, প্রাণধারণ করিতেন; তৈলের অভাবে, রাত্রিতে প্রদীপ জালিয়া পড়িতে পাইতেন না; সন্ধ্যার পর, সহাধ্যায়ীদিগের আলয়ে গিয়া, পাঠ করিতেন। স্কটলণ্ড শীতের অতিশয় প্রাচুর্যব; রাত্রিতে, পাথরিয়া কয়লায় অগ্নি জালিয়া, সেই অগ্নির উত্তাপে, শীতনিবারণ করিতে হয়। কিন্তু, এডামের কয়লা কিনিবার সঙ্গতি ছিল না। অসহ্য শীতবোধ হইলে, তিনি, কিয়ৎ ক্ষণ, বেগে দৌড়িয়া বেড়া-

ইতেন; তাহাতে, শরীর গরম হইয়া, আপাততঃ, শীতনিবারণ হইত । এত কষ্ট পাইয়াও, তিনি, কণকালের নিষিদ্ধ, লেখা পড়ায় যত্নের ক্রটি করেন নাই; এবং, সেই যত্নের ফলে, নানা বিজ্ঞান পারদর্শী, ও পরিশেষে এডিনবরাহ প্রধান বিজ্ঞালয়ের অধ্যক্ষ হইরাছিলেন ।

---

## লমনসক

রুশিয়ার অন্তঃপাতী আর্কেন্গেল প্রদেশে, কোল-  
মগর নামে এক নগর আছে। এই নগরে লমন-  
সকের জন্ম হয়। ইঁহার পিতা অতি দুঃখী ছিলেন;  
সমুদ্র হইতে মৎস্য ধরিয়া, বাজারে বিক্রয় করিয়া,  
জীবিকানির্বাহ করিতেন। লমনসক, কয়েক বার,  
পিতার সঙ্গে, খেত ও উত্তর সাগরে মৎস্য  
ধরিতে গিয়াছিলেন। তিনি, উত্তরকালে, পৈতৃক  
ব্যবসায় অবলম্বন করিতেন, তাহার সন্দেহ নাই।  
কিন্তু, সৌভাগ্য ক্রমে, লেখা পড়া বিষয়ে, তাঁহার  
অতিশয় অনুরাগ ছিল। লেখা পড়া বিষয়ে,  
তাদৃশ অনুরাগ ছিল বলিয়া, তিনি চিরস্মরণীয়  
হইয়া গিয়াছেন।

শীতকালে, মৎস্য ধরিতে বাইতে হইত না।  
লমনসক, সেই সময়ে, নিশ্চিন্ত হইয়া, আন্তরিক  
যত্ন সহকারে, অধ্যয়ন করিতেন। এক পাদরি,  
অনুগ্রহ করিয়া, তাঁহাকে শিক্ষা দিতেন। তাঁহার  
নিকট ব্যাকরণ, পাঠীগণিত, গীতাবলী, এই তিন  
খানি মাত্র পুস্তক ছিল। তিনি, অজস্র পাঠ করিয়া,  
এ তিন পুস্তক আশ্রিত কণ্ঠস্থ করিয়াছিলেন।

উক্ত তিন পুস্তকের পাঠ দ্বারা, বিজ্ঞান কিষ্কিৎ  
আশ্বাদ পাইয়া, লেখা পড়া বিষয়ে, তাঁহার অতি-  
শয় যত্ন ও ইচ্ছা হইল। তখন তিনি মস্কো নগরে  
গমন করিলেন ; এবং, তৎকাল এক বিজ্ঞালয়ে  
প্রবিষ্ট হইয়া, অল্প দিনের মধ্যেই, এত শিক্ষা  
করিলেন যে, তদৃষ্টে তাঁহার উপর অনেকের  
অনুগ্রহ হইল। সেই অনুগ্রহের বলে, নানা  
বিজ্ঞালয়ে অধ্যয়ন করিয়া, তিনি বহুবিধ বিজ্ঞায়  
অদ্বিতীয় পণ্ডিত হইয়া উঠিলেন। প্রথমতঃ, তিনি,  
এক অধ্যাপকের পদে নিযুক্ত হন ; পরিশেষে,  
রাজমন্ত্রী পদ পর্য্যন্ত প্রাপ্ত হইয়াছিলেন ।

দেখ ! লমনসফ ও তাঁহার পিতা, উভয়ের কত  
অন্তর । লমনসফের পিতা, মৎস্য ধরিয়া ও মৎস্য  
বিক্রয় করিয়া, জীবন কাটাইয়া গিয়াছিলেন ;  
কিন্তু, লমনসফ নানা বিজ্ঞায় অদ্বিতীয় পণ্ডিত,  
অধ্যাপক, ও রাজমন্ত্রী পর্য্যন্ত হইয়াছিলেন ।  
লেখা পড়ার আন্তরিক যত্ন ও আন্তরিক অনুরাগ  
ছিল বলিয়া, তিনি এরূপ হইতে পারিয়াছিলেন ;  
নতুবা, তাঁহাকেও, নিঃসন্দেহ, পৈতৃক ব্যবসায়  
অবলম্বন করিয়া, জীবন কাটাইতে হইত ।

---

## মেডক্স

এই ব্যক্তি লণ্ডন নগরে জন্ম গ্রহণ করেন। ইনি অতি হুঃখীর সন্তান; অল্প বয়সেই, পিতৃহীন ও মাতৃহীন হন। তাঁহার আত্মীয়েরা তাঁহাকে, এই অভিপ্রায়ে, এক রুটিওয়ালার দোকানে নিযুক্ত করিয়া দেন যে, তথায় থাকিয়া কর্ম্ম শিখিয়া, উত্তরকালে, ঐ ব্যবসায় অবলম্বন পূর্ব্বক, জীবিকানির্ব্বাহ করিতে পারিবেন। কিন্তু, লেখা পড়া শিখিবার নিমিত্ত, তাঁহার আন্তরিক ইচ্ছা ও যত্ন ছিল। পুস্তক পাইলে, তিনি, সকল কর্ম্ম ছাড়িয়া, পড়িতে বসিতেন। সুতরাং, তাঁহাকে রাখিয়া, রুটিওয়ালার তাদৃশ উপকার-বোধ হইত না। তাঁহাকে পড়িতে দেখিলে, সে অতিশয় বিরক্ত হইত।

কলতঃ, উভয় পক্ষেরই বিলক্ষণ অনুরোধ ঘটিয়া উঠিল।, অবাধে, মনের সাথে, পড়িতে পাইতেন না, এজন্য, মেডক্স মনে মনে অতিশয় বিরক্ত হইতেন; আর, তিনি, কর্ম্মের সময় কর্ম্ম না করিয়া, পড়িতে বসিতেন; এজন্য, রুটিওয়ালার

তাহার উপর অতিশয় বিরক্ত হইত । পরিশেষে, রুটিওয়ালা তাঁহাকে দোকান হইতে তাড়াইয়া দিল । মেডক্সের আত্মীয়েরা, লেখা পড়া বিষয়ে, তাহার অসাধারণ যত্ন দেখিয়া, তাঁহাকে স্কটলণ্ডে পাঠাইলেন ; এবং, এই অভিপ্রায়ে অবর্ডিন বিশ্ববিদ্যালয়ে প্রবিষ্ট করিয়া দিলেন যে, যাহাতে, উত্তরকালে, পাদরির কৰ্ম করিতে পারেন, তদুপযুক্ত বিদ্যাভ্যাস করিবেন ।

তথায় তিনি, কিছু দিন, উত্তম রূপে, অধ্যয়ন করিলেন ; কিন্তু, নানা কারণে বিরক্ত হইয়া, ঐ বিশ্ববিদ্যালয় ছাড়িয়া দিয়া, ইংলণ্ডে ফিরিয়া আসিলেন ; এবং, লণ্ডনের বিশপ গিবনসের সহায়তায়, কেম্ব্রিজ বিশ্ববিদ্যালয়ে প্রবিষ্ট হইয়া, বিশিষ্টরূপে বিজ্ঞোপার্জন করিলেন । এইরূপে, অভিলাষানুরূপ বিদ্যালাত করিয়া, মেডক্স পাদরির কৰ্মে নিযুক্ত হইলেন । উত্তরোত্তর, তাহার পদবৃদ্ধি হইতে লাগিল । পরিশেষে, তিনি বিশপের পদ প্রাপ্ত হইলেন ।

দেখ ! লেখা পড়ায় আন্তরিক যত্ন থাকার কত গুণ ! যে ব্যক্তি, রুটিওয়ালার দোকানে থাকিয়া, কৰ্ম শিখিয়া, উত্তরকালে, ঐ ব্যবসায়

দ্বারা, জীবিকানির্বাহ করিবেন বলিয়া, স্থির  
হইয়াছিল, সেই ব্যক্তি, আন্তরিক যত্ন সহকারে,  
উত্তমরূপ লেখা পড়া শিখিয়াছিলেন বলিয়া,  
পরিশেষে বিশপের পদ প্রাপ্ত হইলেন ।

---



## লঙ্কামণ্টেনস

এই ব্যক্তি, ডেনমার্কের অন্তঃপাতী লঙ্কসবর্গ গ্রামে, জন্মগ্রহণ করেন। ইঁহার পিতা, প্রতি-দিন জন খাটিয়া, সংসারযাত্রানির্বাহ করিতেন ; সুতরাং, পুত্রদিগকে লেখা পড়া শিখাইবার ক্ষমতা ছিল না। লঙ্কামণ্টেনসের আট বৎসর বয়সের সময়, পিতৃবিয়োগ হয়। সুতরাং, তিনি নিতান্ত নিরাশ্রয় হইয়া পড়িলেন। তাঁহার মাতুল তাঁহাকে, লেখা পড়া শিখিবার নিমিত্ত নিতান্ত উৎসুক দেখিয়া, এক বিদ্যালয়ে পাঠাইয়া দিলেন। তিনি তথায় অধ্যয়ন করিতে লাগিলেন।

লঙ্কামণ্টেনসের আর কয়টি সহোদর ছিল। তাহারা লেখা পড়া শিখিতে পার নাই। এক্ষণে, তাঁহাকে, বিদ্যালয়ে প্রবিষ্ট হইয়া, লেখা পড়া করিতে দেখিয়া, তাহাদের অতিশয় ঈর্ষ্যা জন্মিল। আমরা লেখা পড়া শিখিতে পাইলাম না, ও কেন শিখিবেক, এই হিংসাতে, তাহারা তাঁহার উপর এত উৎপাত করিতে আরম্ভ করিল যে, তিনি বিরক্ত হইয়া, দেশত্যাগ করিয়া,

কিন্লও প্রদেশের অন্তঃপাতী উইবর্গ নগরে গমন করিলেন ।

কিছু দিন বিছালয়ে থাকিয়া, ভাল করিয়া লেখা পড়া শিখিবার নিমিত্ত, তাঁহার অতিশয় ইচ্ছা হইয়াছিল । এক্ষণে তিনি, এই স্থানে উপস্থিত হইয়া, লেখা পড়ার চেষ্টা দেখিতে লাগিলেন । কিন্তু, কোনও সুযোগ ঘটিয়া উঠিল না । অন্ততঃ, খাওয়া, পরা, ও পুস্তকক্রয়ের সংস্থান না হইলে, লেখা পড়া চলিতে পারে না । অনেক চেষ্টা দেখিয়াও, তিনি এ সমুদয়ের যোগাড় করিয়া উঠিতে পারিলেন না ; অবশেষে, অনেক ভাবিয়া, এক বিছালয়ে প্রবিষ্ট হইলেন । তিনি, দিবাভাগে, তথায় থাকিয়া, অধ্যয়ন করিতেন ; রাত্রিতে, অন্য স্থানে কৰ্ম্ম করিয়া, কিছু কিছু উপার্জন করিতেন ; তাহাতেই কষ্টে আহাৰাদি সম্পন্ন হইত ।

ক্রমাগত এগার বৎসর, এইরূপ কষ্ট পাইয়া, উইবর্গে থাকিয়া, তিনি, আন্তরিক যত্ন সহকারে, বিলক্ষণ লেখা পড়া শিখিলেন । কিছু দিন পরে, তিনি স্বদেশে প্রতিগমন করিলেন, এবং, ডেন-মার্কের রাজধানী কোপনহেগন নগরে, যে বিশ্ব-

বিদ্যালয় ছিল, তথায় গণিতশাস্ত্রের অধ্যাপক নিযুক্ত হইলেন । তিনি, যুত্বয় দুই বৎসর পূর্ব পর্যন্ত, ঐ কর্ম করিয়াছিলেন । এতদ্ব্যতিরিক্ত, তিনি, নানা বিষয়ে, গ্রন্থরচনা করিয়া গিয়াছেন ।

দেখ ! যে ব্যক্তির পিতা, প্রতিদিন জন খাটিয়া, কষ্টে সংসারযাত্রানির্বাহ করিতেন, সেই ব্যক্তি, যৎপরোনাস্তি কষ্ট পাইয়াও, আন্তরিক যত্নের গুণে, বিশিষ্টরূপ বিদ্যোপার্জন করিয়া, বিশ্ববিদ্যালয়ের অধ্যাপক হইয়াছিলেন ।

---

## রেমস

ফ্রান্সের অন্তর্বর্তী পিকার্ডি প্রদেশে, রেমসের জন্ম হয়। রেমসের পিতা যার পর নাই দুঃখী ছিলেন। রেমস, বাল্যকালে, মেঘচারণকর্মে নিযুক্ত হইয়াছিলেন। কিছু দিনেই, রাখালি কর্মে তাঁহার বিরক্তি জন্মিল, এবং, বিজ্ঞাশিক্ষা করিবার নিমিত্ত, একান্ত অভিলাষ হইল। এখানে থাকিলে, রাখালিও স্মৃতিবেক না, এবং লেখা পড়াও শিখিতে পাইব না ; এই ভাবিয়া, তিনি, পিতার আশ্রয় হইতে পলায়ন করিয়া, পারিস রাজধানীতে উপস্থিত হইলেন। এই সময়ে, তাঁহার বয়স আট বৎসর মাত্র।

পারিসে উপস্থিত হইয়া, রেমস, প্রথমতঃ কিছু দিন, বিস্তর ক্লেশ পাইয়াছিলেন। তিনি, ভাল করিয়া লেখা পড়া শিখিবার নিমিত্ত, এত ব্যগ্র হইয়াছিলেন যে, অন্য কোনও সুযোগ করিতে না পারিয়া, অবশেষে, নেবারের বিজ্ঞালয়ে, পরিচারণকের কর্মে নিযুক্ত হইলেন ; দিবসে যে অবসর পাইতেন তাহাতে, এবং রাত্রিতে, সবিশেষ পরিশ্রম করিয়া, অল্প দিনের মধ্যেই

বিলক্ষণ শিক্ষা করিলেন । এ পর্য্যন্ত, তিনি শিক্ষা বিষয়ে প্রায় কাহারও সাহায্য পান নাই ।

পরিশেষে, তিন বৎসর ছয় মাস, রীতিমত, উপদেশ পাইয়া, এবং, স্বয়ং প্রাণপণে যত্ন ও অবিভ্রান্ত পরিশ্রম করিয়া, তিনি এক জন অদ্বিতীয় বিদ্বান হইয়া উঠিলেন । বস্তুতঃ, তিনি এক জন বিখ্যাত পণ্ডিত ও বিখ্যাত গ্রন্থ-কর্তা ছিলেন, এবং, ন্যায়শাস্ত্র বিষয়ে, হুতন মত প্রচারিত করিয়া গিয়াছেন । কিন্তু, লেখা পড়া বিষয়ে আন্তরিক ইচ্ছা ও আন্তরিক যত্ন না থাকিলে, তিনি কখনই এরূপ হইতে পারিতেন না ।

সম্পূর্ণ ।

PRINTED BY YAJNESWARA MUKHOPADHYAYA,

AT THE SANSKRIT PRESS,

NO. 62, AMHERST STREET, CALCUTTA.

1889.





